

ओं नमः परमात्मने, श्री महागणपतये नमः,
श्री गुरुभ्यो नमः, हरिः ओं

कृष्ण यजुर्वेदीय तैत्तिरीय संहिता पद पाठः
(वाक्य सहित)

पञ्चमकाण्डे द्वितीयः प्रश्नः

Notes:

1. Please refer to the book “TS Kandam 1” and “TS 1.1 pada paadam with Vaakyam” for notes and conventions used in this Compilation.
2. Please download our vedic compilations from our web site www.vedavms.in

Version Notes:

This is now the current Version 1.0 dated February 28, 2021.

1. This replaces the earlier version 0.1 dated May 31, 2020.
2. This version has been updated with the errors found and reported till February 15, 2021.
3. Required convention, style and presentation improvements or standardisations has been done wherever applicable.
4. Notify your corrections / suggestions etc to our email id vedavms@gmail.com

Earlier Versions

1st	Version Number	0.0 dated 31st August 2018
2nd	Version Number	0.0 dated 31st January 2019
3rd	Version Number	0.0 dated 30th September 2019
4th	Version Number	0.1 dated 31st May 2020

Table of Contents

5 कृष्ण यजुर्वेदीय तैत्तिरीय संहितायां पद पाठे पञ्चमं काण्डं	4
5.2 पञ्चमकाण्डे द्वितीयः प्रश्नः – चित्युपक्रमाभिधानं	4

ओं नमः परमात्मने, श्री महागणपतये नमः,

श्री गुरुभ्यो नमः , हरिः ओं

5 कृष्ण यजुर्वेदीय तैत्तिरीय संहितायां पद पाठे पञ्चमं काण्डं

5.2 पञ्चमकाण्डे द्वितीयः प्रश्नः – चित्युपक्रमाभिधानं

TS 5.2.1.1

विष्णु॑मुखा॒ वै दे॒वा इ॒च्छन्द्वा॑भिरि॒मान् लो॒कान॑न॒पज॒य्य म॒भ्यज॑यन्.
यद्-विष्णु॑क्र॒मान् क्र॒मते॒ विष्णु॑रेव भू॒त्वा यज॑मान इ॒च्छन्द्वा॑भिरि॒मान्
लो॒कान॑न॒पज॒य्यम॒भि ज॑यति विष्णोः॑ क्र॒मोऽस्य॑भि॒माति॑हेत्याह गायत्री
वै पृ॒थि॒वी त्रै॒ष्टुभ॑मन्तरि॒क्षं जा॑गती द्यौ॒रानु॑ष्टुभीर्दि॒श इ॒च्छन्द्वा॑भिरेवे॒मान्
लो॒कान् य॑थापूर्वम॒भि ज॑यति प्र॒जाप॑तिर॒ग्निम॑सृजत

सोऽस्मा॑त् सृष्टः – [] 1

TS 5.2.1.1 - Padam

विष्णु॑मुखा॒ इति॒ विष्णु॑ – मु॒खाः । वै । दे॒वाः । छन्द्वा॑भिरिति
छन्द्वा॑भिः । इ॒मान् । लो॒कान् । अ॒न॒प॒ज॒य्यमि॑त्यन॒प – ज॒य्यम् ।

अ॒भी॒ति॑ । अ॒ज॒य॒न् । यत् । वि॒ष्णु॒क्र॒मा॒नि॒ति॑ वि॒ष्णु॒-क्र॒मा॒न् । क्र॒म॒ते॑ ।
 वि॒ष्णुः॑ । ए॒व । भू॒त्वा । य॒ज॒मा॒नः॑ । छ॒न्दो॑भि॒रि॒ति॑ छ॒न्दः॑ – भिः॑ ।
 इ॒मा॒न् । लो॒का॒न् । अ॒न॒प॒ज॒य्य॒मि॒त्य॒न॒प॒-ज॒य्य॒म् । अ॒भी॒ति॑ । ज॒य॒ति॑ ।
 वि॒ष्णोः॑ । क्र॒मः॑ । अ॒सि॑ । अ॒भि॒मा॒ति॒हे॒त्य॒भि॒मा॒ति॒-हा॑ । इ॒ति॑ । आ॒ह॒ ।
 गा॒य॒त्री॑ । वै । पृ॒थि॒वी । त्रै॒ष्टु॒भ॒म् । अ॒न्त॒रि॒क्ष॒म् । जा॒ग॒ती॑ । द्यौः॑ ।
 आ॒नु॒ष्टु॒भी॒रि॒त्या॒नु॑ – स्तु॒भीः॑ । दि॒शः॑ । छ॒न्दो॑भि॒रि॒ति॑ छ॒न्दः॑ – भिः॑ ।
 ए॒व । इ॒मा॒न् । लो॒का॒न् । य॒था॒पूर्व॑मि॒ति॑ य॒था – पूर्व॑म् । अ॒भी॒ति॑ ।
 ज॒य॒ति॑ । प्र॒जा॒प॒ति॒रि॒ति॑ प्र॒जा – प॒तिः॑ । अ॒ग्नि॒म् । अ॒सृ॒ज॒त॑ ।
 सः॑ । अ॒स्मा॒त् । सृ॒ष्टः॑ । 1 (50)

TS 5.2.1.2

प॒रा॒डै॒त् तमे॒तया॑ ऽन्वै॒द॒क्र॒न्द॒दि॒ति॑ तया॑ वै सौ॒ऽग्नेः॑ प्रि॒यं धा॒मा॒ऽवा॒रु॒न्ध॑
 यदे॒ता॒म॒न्वा॒हा-ग्ने॒रे॒वै॒तया॑ प्रि॒यं धा॒मा॒वा॒ रु॒न्ध ई॒श्व॒रो वा ए॒ष प॒रा॒ड्
 प्र॒द॒धो॑ यो वि॒ष्णु॒क्र॒मा॒न् क्र॒म॒ते च॒त॒सृ॒भि॒रा॑ वर्त॒ते च॒त्वा॒रि॒ छ॒न्दा॑ऽसि॒
 छ॒न्दा॑ऽसि॒ ख॒लु वा अ॒ग्नेः॑ प्रि॒या त॒नूः प्रि॒या॒मे॒वा॒स्य॑ त॒नु॒व॒म॒भि-[] 2

TS 5.2.1.2 - Padam

पराङ् । ऐत् । तम् । ए॒तया॑ । अ॒न्वि॒ति॑ । ऐत् । अ॒क्र॒न्दत् । इति॑ ।
तया॑ । वै । सः । अ॒ग्नेः । प्रि॒यम् । धाम॑ । अ॒वे॒ति॑ । अ॒रु॒न्ध॒ । यत् ।
ए॒ताम् । अ॒न्वा॒हे॒त्यनु॑-आह॑ । अ॒ग्नेः । ए॒व । ए॒तया॑ । प्रि॒यम् । धाम॑ ।
अ॒वे॒ति॑ । रु॒न्धे । ई॒श्वरः॑ । वै । ए॒षः । पराङ् । प्र॒द॒घ॒ इति॑ प्र -द॒घः ।
यः । वि॒ष्णु॒क्र॒मानि॑ति वि॒ष्णु - क्र॒मान् । क्र॒म॒ते । च॒त॒सृ॒भि॒रिति॑
च॒त॒सृ - भिः॑ । ए॒ति॑ । व॒र्त॒ते । च॒त्वा॒रि॑ । छ॒न्दा॒ँसि॑ । छ॒न्दा॒ँसि॑ ।
ख॒लु॑ । वै । अ॒ग्नेः । प्रि॒या । त॒नूः । प्रि॒याम् । ए॒व । अ॒स्य॒ ।
त॒नु॒वम्॑ । अ॒भी॒ति॑ । 2 (50)

TS 5.2.1.3

पर्या॑व॒र्त॒ते दक्षि॑णा पर्या॑व॒र्त॒ते स्व॒मे॒व वी॒र्य॑म॒नु पर्या॑व॒र्त॒ते तस्मा॑द्-
दक्षि॑णो ऽर्द्ध आ॒त्म॒नो वी॒र्या॑व॒त्त॒रो ऽथो॑ आ॒दि॒त्यस्यै॒वाऽऽ*वृ॒त॒म॒नु
पर्या॑व॒र्त॒ते शु॒न॒श्शे॒प॒माजी॑र्तिं व॒रु॒णोऽगृ॑ह्णाथ् स ए॒तां वा॒रु॒णीम॑पश्यत्
तया॑ वै स आ॒त्मा॒नं व॒रु॒णपा॑शादमुञ्चद्-व॒रु॒णो वा ए॒तं गृ॑ह्णाति

य उ॒खां॑ प्र॒तिमु॒ञ्च॒त उ॒दु॒त्त॒मं॑ व॒रु॒ण पा॒श॒म॒स्मदि॒त्याहा॑ –

ऽऽत्मा॑न॒मेवै॒तया॑ – [] 3

TS 5.2.1.3 - Padam

पर्या॑व॒र्त॒त इति॑ परि – आ॒व॒र्त॒ते । द॒क्षि॒णा । पर्या॑व॒र्त॒त इति॑
परि – आ॒व॒र्त॒ते । स्व॒म् । ए॒व । वी॒र्य॑म् । अ॒न्वि॒ति । पर्या॑व॒र्त॒त इति॑
परि – आ॒व॒र्त॒ते । तस्मा॑त् । द॒क्षि॒णः । अ॒र्द्धः॑ । आ॒त्म॒नः॑ ।
वी॒र्या॑व॒त्तर॑ इति॑ वी॒र्या॑व॒त् – त॒रः॑ । अथो॑ इति॑ । आ॒दि॒त्यस्य॑ । ए॒व ।
आ॒वृ॒त॒मि॒त्या॑ – वृ॒त॒म् । अ॒न्वि॒ति । पर्या॑व॒र्त॒त इति॑ परि – आ॒व॒र्त॒ते ।
शु॒न॒श्शो॑प॒म् । आ॒जी॒ग॒र्ति॑म् । व॒रु॒णः॑ । अ॒गृ॒ह्णा॒त् । सः॑ । ए॒ता॒म् ।
वा॒रु॒णी॒म् । अ॒प॒श्य॒त् । तया॑ । वै । सः॑ । आ॒त्मा॑न॒म् । व॒रु॒णपा॒शादि॑ति॑
व॒रु॒ण – पा॒शा॒त् । अ॒मु॒ञ्च॒त् । व॒रु॒णः॑ । वै । ए॒त॒म् । गृ॒ह्णा॒ति । यः॑ ।
उ॒खाम्॑ । प्र॒तिमु॒ञ्च॒त इति॑ प्र॒ति – मु॒ञ्च॒ते॑ । उ॒दि॒ति ।
उ॒त्त॒म॒मि॒त्यु॒त् – त॒म॒म् । व॒रु॒ण । पा॒श॒म् । अ॒स्म॒त् । इति॑ । आ॒ह ।
आ॒त्मा॑न॒म् । ए॒व । ए॒तया॑ । 3 (50)

TS 5.2.1.4

वरुणपा॒शान् मु॒ञ्च॒त्या त्वा॑ ऽहार्ष॒मित्या॒हाऽऽ ह्ये॒न॒ꣳ ह॑रति
ध्रु॒वस्ति॒ष्ठा ऽवि॑चाचलि॒रित्या॑ह॒ प्रति॑ष्ठित्यै॒ विश॑ स्त्वा॒ सर्वा॑
वाञ्छ॒न्त्वित्या॑ह॒ विशै॑वैन॒ꣳ सम॑र्द्धयत्यस्मिन् रा॒ष्ट्रमधि॑ श्रयेत्या॑ह
रा॒ष्ट्रमे॒वास्मिन् ध्रु॒वम॑कर्यं का॒मये॑त रा॒ष्ट्रꣳ स्या॒दिति॑ तं मन॑सा
ध्याये॑द्-रा॒ष्ट्रमे॒व भ॑वत्य- [] 4

TS 5.2.1.4 - Padam

वरुणपा॒शादिति॑ वरुण-पा॒शात् । मु॒ञ्च॒ति । ए॒ति । त्वा॑ । अ॒हार्ष॒म् ।
इति॑ । आ॒ह । ए॒ति । हि॑ । ए॒नम् । ह॑रति । ध्रु॒वः । ति॒ष्ठ ।
अवि॑चाचलि॒रित्यवि॑ - चा॒चलिः॑ । इति॑ । आ॒ह । प्र॒ति॒ष्ठित्या॑ इति॑
प्रति॑ - स्थि॒त्यै । विशः॑ । त्वा॑ । सर्वाः॑ । वाञ्छ॒न्तु । इति॑ । आ॒ह ।
वि॒शा । ए॒व । ए॒नम् । समि॑ति । अ॒र्द्धय॑ति । अ॒स्मिन् । रा॒ष्ट्रम् ।
अधी॑ति । श्रय॑ । इति॑ । आ॒ह । रा॒ष्ट्रम् । ए॒व । अ॒स्मिन् । ध्रु॒वम् ।
अ॒कः । यम् । का॒मये॑त । रा॒ष्ट्रम् । स्या॒त् । इति॑ । तम् । मन॑सा ।
ध्या॒येत् । रा॒ष्ट्रम् । ए॒व । भ॒वति॑ । 4 (50)

TS 5.2.1.5

–॒ग्रे॑ बृ॒हन्नु॑ष॒सामूर्द्ध्वो॑ अ॒स्थादि॒त्याहाऽग्र॑मे॒वैन॑ꣳ स॒मानानां॑ करोति
निर्ज॒ग्मि॒वान् तम॑स इत्या॒ह तम॑ ए॒वास्मा॒दप॑ ह॒न्ति ज्योति॑षा–
ऽऽ *गा॒दि॒त्याह॑ ज्योति॑रे॒वा–स्मिन् द॑धाति च॒तसृ॑भिः सा॒दय॑ति च॒त्वारि॑
छन्दा॑ꣳसि छन्दो॑भिरे॒वाऽ–ति॑च्छन्द॒सोत्त॑मया॒ वर्ष॑ वा ए॒षा छन्द॑सां
यदति॑च्छन्दा॒ वर्ष॑मे॒वैन॑ꣳ स॒मानानां॑ करोति स॒द्वती॑ – [] 5

TS 5.2.1.5 - Padam

अ॒ग्रे । बृ॒हन् । उ॒ष॒साम् । ऊ॒र्द्ध्वः । अ॒स्थात् । इति॑ । आ॒ह । अ॒ग्रम् ।
ए॒व । ए॒नम् । स॒मानाना॑म् । क॒रोति॑ । नि॒र्ज॒ग्मि॒वानिति॑ निः–ज॒ग्मि॒वान् ।
तम॑सः । इति॑ । आ॒ह । तमः॑ । ए॒व । अ॒स्मात् । अ॒पेति॑ । ह॒न्ति ।
ज्योति॑षा । एति॑ । अ॒गात् । इति॑ । आ॒ह । ज्योतिः॑ । ए॒व । अ॒स्मिन् ।
द॒धाति॑ । च॒तसृ॑भिरिति॑ च॒तसृ॑ – भिः । सा॒दय॑ति । च॒त्वारि॑ ।
छन्दा॑ꣳसि । छन्दो॑भिरिति॑ छन्दः – भिः । ए॒व ।
अति॑च्छन्द॒सेत्यति॑ – छन्द॒सा । उत्त॑मयेत्युत् – तमया॑ । वर्ष॑ । वै ।

ए॒षा । छ॒न्द॒साम् । यत् । अ॒ति॒च्छ॒न्दा॒ इत्य॑ति – छ॒न्दाः॒ । व॒र्ष्म । ए॒व ।
ए॒नम् । स॒मा॒ना॒नाम् । क॒रो॒ति । स॒द्व॒ती॒ति स॒त् – व॒ती । 5 (50)

TS 5.2.1.6

भ॒व॒ति स॒त्त्व॒मे॒वैनं॑ ग॒म॒य॒ति वा॒थ्स॒प्रे॒णो॒प ति॑ष्ठ॒त ए॒तेन॑ वै
व॒थ्स॒प्री॒र्भा॒ल॒न्दनो॑ऽग्नेः प्रि॒यं धा॒मावा॑रु॒न्धाग्ने॑रे॒वैतेन॑ प्रि॒यं
धा॒माव॑ रु॒न्ध ए॒काद॑शं भ॒वत्ये॒कधै॒व यज॑माने वी॒र्यं॑ द॒धाति॑ स्तो॒मेन॑ वै
दे॒वा अ॒स्मिन् लो॒क आ॒र्द्ध॒नु॒वन् छ॒न्दो॑भि॒रमु॒ष्मिन्थ् स्तो॒मस्ये॒व खलु॑
वा ए॒तद्-रू॒पं य॑द्-वा॒थ्स॒प्रं य॑द्-वा॒थ्स॒प्रे॒णो॒पति॑ष्ठ॒त- [] 6

TS 5.2.1.6 - Padam

भ॒व॒ति । स॒त्त्व॒मि॒ति स॒त् – त्व॒म् । ए॒व । ए॒नम् । ग॒म॒य॒ति ।
वा॒थ्स॒प्रे॒णो॒ति वा॒थ्स – प्रे॒ण । उ॒पे॒ति । ति॑ष्ठ॒ते । ए॒तेन॑ । वै ।
व॒थ्स॒प्री॒रि॒ति व॒थ्स – प्रीः । भा॒ल॒न्द॒नः । अ॒ग्नेः । प्रि॒यम् । धा॒म ।
अ॒वे॒ति । अ॒रु॒न्ध । अ॒ग्नेः । ए॒व । ए॒तेन॑ । प्रि॒यम् । धा॒म । अ॒वे॒ति ।
रु॒न्धे । ए॒का॒द॒शम् । भ॒व॒ति । ए॒क॒धे॒त्ये॒क – धा । ए॒व । यज॑माने ।
वी॒र्य॑म् । द॒धा॒ति । स्तो॒मेन॑ । वै । दे॒वाः । अ॒स्मिन् । लो॒के ।

आ॒र्ध॒न्नु॒वन् । छ॒न्दो॒भिरि॒ति छ॒न्दः – भिः । अ॒मुष्मि॒न् । स्तो॒मस्य॑ ।
इ॒व । ख॒लु । वै । ए॒तत् । रू॒पम् । यत् । वा॒थ्सप्र॑मिति वा॒थ्स-प्रम् ।
यत् । वा॒थ्सप्रे॑णेति वा॒थ्स-प्रेण॑ । उ॒पति॑ष्ठत इत्यु॒प-ति॑ष्ठते । 6 (50)

TS 5.2.1.7

इ॒ममे॒व ते॒न लो॒कम॒भि ज॑यति यद्-वि॒ष्णु॒क्रमा॑न् क्र॒मते॒ ऽमु॒मे॒व
तैर्लो॒कम॒भि ज॑यति पूर्वे॒द्युः प्र॑ क्रा॒मत्यु॒त्तरे॒द्यु-रु॒प ति॑ष्ठते तस्मा॒द्-
यो॒गेऽन्या॑सां प्र॒जानां॑ म॒नः क्षे॒मेऽन्या॑सां तस्मा॒द्-या॒याव॑रः क्षे॒म्यस्ये॑शे
तस्मा॒द्-या॒याव॑रः क्षे॒म्यम॑द्ध्यव॒स्यति॑ मु॒ष्टी॒ करो॑ति वा॒चं य॑च्छति
य॒ज्ञस्य॑ धृ॒त्यै ॥ 7

TS 5.2.1.7 - Padam

इ॒मम् । ए॒व । ते॒न । लो॒कम् । अ॒भीति॑ । ज॒यति॑ । यत् ।
वि॒ष्णु॒क्रमा॑निति वि॒ष्णु – क्र॒मान् । क्र॒मते॑ । अ॒मुम् । ए॒व । तैः ।
लो॒कम् । अ॒भीति॑ । ज॒यति॑ । पूर्वे॒द्युः । प्रेति॑ । क्रा॒मति॑ । उ॒त्तरे॒द्युः ।
उ॒पेति॑ । ति॒ष्ठते॑ । तस्मा॑त् । यो॒गे । अ॒न्या॑साम् । प्र॒जाना॑मिति
प्र – जा॑नाम् । म॒नः । क्षे॒मे । अ॒न्या॑साम् । तस्मा॑त् । या॒याव॑रः ।

क्षेम्यस्य । ई॒शे । तस्मा॑त् । या॒या॒वरः । क्षेम्य॑म् ।
 अ॒द्ध्यव॑स्यतीत्य॒धि – अव॑स्यति । मु॒ष्टी इति॑ । क॒रोति॑ । वाच॑म् ।
 य॒च्छति॑ । य॒ज्ञस्य॑ । धृ॒त्यै ॥ 7 (42) (सृ॒ष्टौ – (1) भ्य॑ – तया॑ –
 भव॑ति – स॒द्वत्यु॑ – प॒तिष्ठ॑ते – द्वि॒चत्वारि॑ंश॒च्च) (A1)

TS 5.2.2.1

अ॒न्नप॑तेऽन्नस्य॑ नो दे॒हीत्या॑हा-ग्नि॒र्वा अ॒न्नप॑तिः स ए॒वास्मा॑ अ॒न्नं प्र
 य॒च्छत्य॑नमीवस्य॑ शु॒ष्मिण॑ इत्या॒हाय॑क्ष्मस्येति॑ वावै॒तदा॑ह प्र प्र॒दाता॑रं
 ता॒रिष॑ ऊ॒र्जं नो॑ धेहि॒ द्विप॑दे चतु॒ष्पद॑ इत्या॒हाऽऽशि॑षमेवै॒तामा॑ शा॒स्त
 उ॒दु त्वा वि॒श्वे दे॒वा इत्या॑ह प्रा॒णा वै वि॒श्वे दे॒वाः- [] 8

TS 5.2.2.1 - Padam

अ॒न्नप॑त इत्य॒न्न – प॒ते । अ॒न्नस्य॑ । नः । दे॒हि । इति॑ । आ॒ह ।
 अ॒ग्निः । वै । अ॒न्नप॑तिरित्य॒न्न – प॒तिः । सः । ए॒व । अ॒स्मै ।
 अ॒न्नम् । प्रेति॑ । य॒च्छति॑ । अ॒नमी॑वस्य॑ । शु॒ष्मिणः॑ । इति॑ । आ॒ह ।
 अ॒यक्ष्म॑स्य॑ । इति॑ । वा॒व । ए॒तत् । आ॒ह । प्रेति॑ । प्र॒दाता॑रमिति॑
 प्र – दा॒ता॒रम् । ता॒रिषः॑ । ऊ॒र्जम् । नः । धे॒हि ।

द्वि॒पद॒ इति॑ द्वि – पदे॑ । चतु॑ष्पद॒ इति॑ चतुः – पदे॑ । इति॑ । आ॒ह ।
आ॒शि॒ष॒मि॒त्या – शि॒ष॒म् । ए॒व । ए॒ता॒म् । ए॒ति । शा॒स्ते । उ॒दि॒ति ।
उ । त्वा । वि॒श्वे॑ । दे॒वाः । इति॑ । आ॒ह । प्रा॒णा इति॑ प्र-अ॒नाः । वै ।
वि॒श्वे॑ । दे॒वाः । 8 (50)

TS 5.2.2.2

प्रा॒णैरे॒वैन॒मुद् य॑च्छते॒ ऽग्ने॒ भर॑न्तु चि॒त्तिभि॑रि॒त्याह॑ यस्मा॒ ए॒वैनं॑
चि॒त्तायो॑द्यच्छते॒ तेनै॒वैन॑ꣳ सम॑र्द्धयति चत॒सृभि॑रा सा॒दय॑ति च॒त्वारि॑
छन्दा॑ꣳसि छन्दा॑भिरे॒वा-ति॑च्छन्दसो॒त्तम॑या वर्ष्म॒ वा ए॒षा छन्द॑सां
य॑दति॒च्छन्दा॒ वर्ष्मै॒वैन॑ꣳ समा॒नानां॑ करोति॒ स॒द्वती॑ भवति
स॒त्त्वमे॒वैनं॑ गमयति॒ प्रेद॑ग्ने॒ ज्योति॑ष्मान्- [] 9

TS 5.2.2.2 - Padam

प्रा॒णैरि॑ति प्र – अ॒नैः । ए॒व । ए॒न॒म् । उ॒दि॒ति । य॑च्छते॒ । अ॒ग्ने॑ ।
भर॑न्तु । चि॒त्तिभि॑रि॒ति चि॒त्ति – भिः॑ । इति॑ । आ॒ह । यस्मै॑ । ए॒व ।
ए॒न॒म् । चि॒त्ताय॑ । उ॒द्यच्छ॑त इत्युत् – य॑च्छते॒ । तेन॑ । ए॒व ।
ए॒न॒म् । समि॑ति । अ॒र्द्धय॑ति । चत॒सृभि॑रि॒ति चत॒सृ – भिः॑ । ए॒ति ।

सा॒द॒य॒ति॒ । च॒त्वा॒रि॒ । छ॒न्दा॑ꣳसि॒ । छ॒न्दो॑भि॒रिति॒ छ॒न्दः॑ – भिः॑ । ए॒व ।
 अति॑छ॒न्द॒सेत्य॑ति – छ॒न्द॒सा॒ । उ॒त्त॒म॒येत्यु॑त् – त॒मया॑ ॥ वर्ष्म॑ । वै ।
 ए॒षा । छ॒न्द॒साम् । यत् । अति॑छ॒न्दा॒ इत्य॑ति – छ॒न्दाः॑ । वर्ष्म॑ । ए॒व ।
 ए॒नम् । स॒मा॒ना॒नाम् ॥ क॒रो॒ति॒ । स॒द्वती॑ति॒ सत् – व॒ती । भ॒वति॑ ।
 स॒त्त्वमि॑ति॒ सत्-त्वम् । ए॒व । ए॒नम् । ग॒म॒य॒ति॒ । प्रे॑ति॒ । इत् । अ॒ग्ने ।
 ज्योति॑ष्मान् । 9 (50)

TS 5.2.2.3

या॒ही॒त्याह॑ ज्योति॑रे॒वास्मिन्॑ दधाति॒ त॒नु॒वा॒ वा ए॒ष हि॑न॒स्ति यꣳ
 हि॑न॒स्ति मा हिꣳसी॑स्त॒नु॒वा ॥ प्र॒जा इ॒त्याह॑ प्र॒जाभ्य॑ ए॒वैनꣳ श॑म॒यति॒
 रक्षाꣳसि॒ वा ए॒तद्-यज्ञꣳ स॑च॒न्ते य॑दन॒ उ॒थ्स॑र्ज॒त्यक्र॑न्द॒दित्य॑न्वाह॒
 रक्ष॑साम॒पह॑त्या॒ अन॑सा॒ वह॑न्त्य॒पचि॑ति-मे॒वास्मिन्॑ दधाति॒
 तस्मा॑दन॒स्वी च॑ र॒थी चा॑ति॒थीना॑-म॒पचि॑त॒तमा॑ – [] 10

TS 5.2.2.3 - Padam

या॒हि॒ । इति॑ । आ॒ह॒ । ज्योतिः॑ । ए॒व । अ॒स्मिन् । द॒धा॒ति॒ । त॒नु॒वा ॥
 वै । ए॒षः । हि॑न॒स्ति॒ । यम् । हि॑न॒स्ति॒ । मा । हिꣳसीः॑ । त॒नु॒वा ॥

प्र॒जा इति॑ प्र – जाः । इति॑ । आ॒ह । प्र॒जाभ्य॑ इति॑ प्र – जाभ्यः ।
 ए॒व । ए॒नम् । श॒म॒य॒ति । र॒क्षा॒सि॑ । वै । ए॒तत् । य॒ज्ञम् । स॒च॒न्ते ।
 यत् । अ॒नः । उ॒थ्स॒र्ज॒तीत्यु॑त्-स॒र्ज॒ति । अ॒क्र॒न्दत् । इति॑ । अ॒न्वि॒ति ।
 आ॒ह । र॒क्ष॒साम् । अ॒प॒ह॒त्या इत्य॑प – ह॒त्यै । अ॒न॒सा । व॒ह॒न्ति ।
 अ॒प॒चि॒ति॒मि॒त्य॑प – चि॒तिम् । ए॒व । अ॒स्मिन् । द॒धा॒ति । तस्मा॑त् ।
 अ॒न॒स्वी । च । र॒थी । च । अ॒ति॒थी॒नाम् ।
 अ॒प॒चि॒त॒त॒मा॒वि॒त्य॑प॒चि॒त – त॒मौ । 10 (50)

TS 5.2.2.4

व॒प॒चि॒ति॒मा॒न् भ॒व॒ति॒ य ए॒वं वै॑द॒ समि॒धा ऽग्निं॑ दु॒व॒स्य॒तेति॑
 घृ॒ता॒नु॒षि॒क्ता-म॒व॒सि॒ते॒ समि॒ध॒मा द॒धा॒ति॒ यथा॑ ऽति॒थ॒य आ॒ग॒ता॒य
 स॒र्पि॒ष्व॒दा॒ति॒थ्यं॑ क॒रि॒य॒ते तादृ॑गे॒व तद्-गा॒य॒त्रि॒या ब्रा॒ह्म॒ण॒स्य॑ गा॒य॒त्रो
 हि ब्रा॒ह्म॒ण॒स्त्रि॒ष्टु॒भा रा॒ज॒न्य॒स्य॑ त्रै॒ष्टु॒भो हि रा॒ज॒न्यो॑ ऽप्सु॒ भस्म॑
 प्र वे॒श॒य॒त्य॒प्सु॒यो॒नि॒र्वा अ॒ग्निः॑ स्वा॒मे॒वैनं॑ यो॒निं ग॒म॒य॒ति॒ तिसृ॑भिः
 प्र वे॒श॒य॒ति॒ त्रि॒वृ॒द्-वा – [] 11

TS 5.2.2.4 - Padam

अ॒प॒चि॒ति॒मा॒नित्य॑प॒चि॒ति – मा॒न् । भ॒व॒ति॒ । यः॑ । ए॒वम् । वे॒द॑ ।
स॒मि॒धे॒ति॒ सं – इ॒धा॑ । अ॒ग्नि॒म् । दु॒व॒स्य॒त॒ । इ॒ति॑ । घृ॒ता॒नु॒षि॒क्ता॒मि॒ति॑
घृ॒त – अ॒नु॒षि॒क्ता॒म् । अ॒व॒सि॒त॒ इत्य॑व – सि॒ते॒ ।
स॒मि॒ध॒मि॒ति॒ सं – इ॒ध॒म् । ए॒ति॑ । द॒धा॒ति॒ । य॒था॑ । अ॒ति॒थ॒ये॒ ।
आ॒ग॒ता॒ये॒त्या – ग॒ता॒य॒ । स॒र्पि॒ष्व॒त् । आ॒ति॒थ्य॒म् । क्रि॒य॒ते॑ । ता॒दृक् ।
ए॒व । त॒त् । गा॒य॒त्रि॒या॒ । ब्रा॒ह्म॒ण॒स्य॑ । गा॒य॒त्रः॑ । हि॒ । ब्रा॒ह्म॒णः॑ । त्रि॒ष्टु॒भा॑ ।
रा॒ज॒न्य॒स्य॑ । त्रै॒ष्टु॒भः॑ । हि॒ । रा॒ज॒न्यः॑ । अ॒प्सि॒स्व॒त्य॒प्-सु॑ । भ॒स्म॑ ।
प्रे॒ति॑ । वे॒श॒य॒ति॒ । अ॒प्सु॒यो॒नि॒रि॒त्य॒प्सु – यो॒निः॑ । वै॒ । अ॒ग्निः॑ ।
स्वा॒म् । ए॒व । ए॒न॒म् । यो॒नि॒म् । ग॒म॒य॒ति॒ । ति॒सृ॒भि॒रि॒ति॑ ति॒सृ-भिः॑ ।
प्रे॒ति॑ । वे॒श॒य॒ति॒ । त्रि॒वृ॒दि॒ति॑ त्रि – वृ॒त् । वै॒ । 11 (50)

TS 5.2.2.5

अ॒ग्नि-र्या॒वा॒ने॒वा॒ग्नि॑ स्तं॑ प्र॒ति॒ष्ठां॑ ग॒म॒य॒ति॒ परा॑ वा ए॒षो॑ऽग्निं
व॒प॒ति॒ यो॑ऽप्सु भ॒स्म प्र॒वे॒श॒य॒ति॒ ज्यो॒ति॒ष्म॒ती॒भ्या-म॒व॒ द॒धा॒ति॒
ज्यो॒ति॒रे॒वा॒स्मिन्॑ द॒धा॒ति॒ द्वा॒भ्यां॑ प्र॒ति॒ष्ठि॒त्यै॒ परा॑ वा ए॒ष प्र॒जां॑ प॒शून्

व॒पति॑ योऽ॒प्सु भ॑स्म प्र॒वे॒शय॑ति पुन॒रूर्जा॑ सह र॒य्येति॑ पुन॒रुदै॑ति
प्र॒जामे॒व प॒शूना॒त्मन् ध॑त्ते पुन॒स्त्वा ऽ॒दित्या॑- [] 12

TS 5.2.2.5 - Padam

अ॒ग्निः । या॒वान् । ए॒व । अ॒ग्निः । तम् । प्र॒ति॒ष्ठा॒मिति॑ प्र॒ति - स्था॒म् ।
ग॒मय॑ति । प॒रेति॑ । वै । ए॒षः । अ॒ग्निम् । व॒पति॑ । यः ।
अ॒प्स्वि॒त्यप् - सु॑ । भ॑स्म । प्र॒वे॒शय॑तीति प्र - वे॒शय॑ति ।
ज्यो॒ति॒ष्मती॑भ्याम् । अ॒वेति॑ । द॒धाति॑ । ज्यो॒तिः । ए॒व । अ॒स्मिन् ।
द॒धाति॑ । द्वा॒भ्याम् । प्र॒ति॒ष्ठित्या॑ इति॑ प्र॒ति - स्थि॒त्यै । प॒रेति॑ । वै ।
ए॒षः । प्र॒जामि॑ति प्र - जा॒म् । प॒शून् । व॒पति॑ । यः ।
अ॒प्स्वि॒त्यप् - सु॑ । भ॑स्म । प्र॒वे॒शय॑तीति प्र - वे॒शय॑ति । पुनः॑ ।
ऊ॒र्जा । स॒ह । र॒य्या । इति॑ । पुनः॑ । उ॒दैती॑त्युत् - ऐति॑ ।
प्र॒जामि॑ति प्र - जा॒म् । ए॒व । प॒शून् । आ॒त्मन् । ध॑त्ते । पुनः॑ ।
त्वा । आ॒दि॒त्याः । 12 (50)

TS 5.2.2.6

रु॒द्रा वस॑वः॒ समि॑न्धता-मि॒त्याहै॑ता वा ए॒तं दे॒वता॒ अ॒ग्रे स॒मैन्ध॑त
ताभि॑रेवैन॒ꣳ समि॑न्धे **बो॒धा** स बो॒धीत्यु॑प तिष्ठ॑ते बो॒धय॑त्येवैनं
तस्मा॑त् सु॒प्त्वा प्र॒जाः प्र बु॑द्ध्यन्ते यथा॑स्था॒नमु॑प तिष्ठ॑ते तस्मा॑द्-
यथा॑स्था॒नं प॒शवः॑ पुन॑रेत्यो॒प तिष्ठ॑न्ते ॥ 13

TS 5.2.2.6 - Padam

रु॒द्राः । वस॑वः । समि॑ति । इ॒न्धता॑म् । इति॑ । आ॒ह । ए॒ताः । वै ।
ए॒तम् । दे॒वताः॑ । अ॒ग्रे । समि॑ति । ऐ॒न्धत॑ । ताभिः॑ । ए॒व । ए॒नम् ।
समि॑ति । इ॒न्धे । बो॒ध । सः । बो॒धि । इति॑ । उपे॑ति । तिष्ठ॑ते ।
बो॒धय॑ति । ए॒व । ए॒नम् । तस्मा॑त् । सु॒प्त्वा । प्र॒जा इति॑ प्र - जाः ।
प्रेति॑ । बु॒द्ध्यन्ते॑ । यथा॑स्था॒नमि॑ति यथा - स्था॒नम् । उपे॑ति ।
तिष्ठ॑ते । तस्मा॑त् । यथा॑स्था॒नमि॑ति यथा - स्था॒नम् । प॒शवः॑ । पुनः॑ ।
एत्ये॑त्या - इत्य॑ । उपे॑ति । तिष्ठ॑न्ते ॥ 13 (42)

(वै विश्वे॑ दे॒वा - ज्योति॑ष्मा - नप॑चिततमौ - त्रिवृ॑द्वा - आ॒दित्या
- द्विच॑त्वारि॒ꣳश॑च्च) (A2)

TS 5.2.3.1

याव॑ती॒ वै पृ॒थि॒वी तस्यै॑ य॒म आ॒धि॒प॒त्यं प॒री॒याय॑ यो वै य॒मं
दे॒व॒य॒ज॒न॒म॒स्या अ॒निर्या॑च्या॒ग्निं चि॒नु॒ते य॒मायै॑न॒ꣳ
स चि॒नु॒ते ऽपे॒तेत्य॑द्ध्यव॒साय॑यति य॒ममे॒व दे॒व॒य॒ज॒न॒म॒स्यै नि॒र्या॑च्या-
ऽऽ॒त्म॒ने ऽग्निं॑ चि॒नु॒त इ॒ष्व॒ग्रेण॑ वा अ॒स्या अ॒नामृ॑त-मि॒च्छन्तो॑ नावि॒न्दन्
ते दे॒वा ए॒तद्-य॑जु॒रप॑श्यन्पे॒तेति॑ यदे॒तेना॑-ध्यव॒साय॑यत्य - [] 14

TS 5.2.3.1 - Padam

याव॑ती । वै । पृ॒थि॒वी । तस्यै॑ । य॒मः । आ॒धि॒प॒त्यमि॒त्याधि॑ - प॒त्यम् ।
प॒री॒ति । इ॒याय॑ । यः । वै । य॒मम् । दे॒व॒य॒ज॒न॒मि॒ति दे॒व - य॒ज॒नम् ।
अ॒स्याः । अ॒निर्या॑च्ये॒त्यनिः॑ - या॒च्य । अ॒ग्निम् । चि॒नु॒ते । य॒माय॑ ।
ए॒नम् । सः । चि॒नु॒ते । अ॒पे॒ति । इ॒त । इ॒ति ।
अ॒द्ध्यव॑साय॒यती॑त्यधि - अ॒व॒साय॑यति । य॒मम् । ए॒व ।
दे॒व॒य॒ज॒न॒मि॒ति दे॒व-य॒ज॒नम् । अ॒स्यै । नि॒र्या॑च्ये॒ति निः॑ - या॒च्य ।
आ॒त्म॒ने । अ॒ग्निम् । चि॒नु॒ते । इ॒ष्व॒ग्रेणे॑तीषु - अ॒ग्रेण॑ । वै । अ॒स्याः ।
अ॒नामृ॑तमि॒त्यना॑ - मृ॒तम् । इ॒च्छन्तः॑ । न । अ॒वि॒न्दन् । ते । दे॒वाः ।

ए॒तत् । य॒जुः । अ॒प॒श्य॒न् । अ॒पे॒ति । इ॒त । इ॒ति । यत् । ए॒तेन॑ ।

अ॒द्ध्य॒व॒सा॒य॒य॒तीत्य॑धि – अ॒व॒सा॒य॒य॒ति । 14 (50)

TS 5.2.3.2

–ना॒मृ॒त ए॒वाग्निं॑ चि॒नु॒त उ॒द्ध॒न्ति॑ य॒दे॒वा॒स्या अ॒मे॒द्ध्यं॑ तद॒प
ह॒न्त्य॒पो ऽवो॑क्ष॒ति शान्त्यै॑ सि॒क॒ता नि॑ व॒प॒त्ये॒तद् वा अ॒ग्ने॒र्वै॑श्वा॒नर॑स्य
रू॒पꣳ रू॒पे॒णै॒व वै॑श्वा॒नर॑म॒व रु॒न्ध ऊ॒षान्॑ नि॒ व॒प॒ति पु॒ष्टि॒र्वा ए॒षा
प्र॒ज॒न॒नं य॑दू॒षाः पु॒ष्ट्या॑मे॒व प्र॒ज॒न॒नेऽग्निं॑ चि॒नु॒तेऽथो॑ सं॒ज्ञान॑ ए॒व
सं॒ज्ञानꣳ ह्ये॑तत् – [] 15

TS 5.2.3.2 - Padam

अ॒ना॒मृ॒त इ॒त्यना॑ – मृ॒ते । ए॒व । अ॒ग्नि॒म् । चि॒नु॒ते । उ॒दि॒ति । ह॒न्ति॑ ।
यत् । ए॒व । अ॒स्याः । अ॒मे॒द्ध्य॒म् । तत् । अ॒पे॒ति । ह॒न्ति॑ । अ॒पः ।
अ॒वे॒ति । उ॒क्ष॒ति । शान्त्यै॑ । सि॒क॒ताः । नी॒ति । व॒प॒ति । ए॒तत् । वै ।
अ॒ग्नेः । वै॒श्वा॒नर॑स्य । रू॒पम् । रू॒पे॒ण । ए॒व । वै॒श्वा॒नर॑म् । अ॒वे॒ति ।
रु॒न्धे । ऊ॒षान् । नी॒ति । व॒प॒ति । पु॒ष्टिः । वै । ए॒षा ।
प्र॒ज॒न॒न॒मि॒ति प्र – ज॒न॒न॒म् । यत् । ऊ॒षाः । पु॒ष्ट्या॑म् । ए॒व ।

प्र॒जन॑न॒ इति॑ प्र – जन॑ने । अ॒ग्नि॑म् । चि॒नु॒ते॑ । अथो॒ इति॑ ।

सं॒ज्ञान॑ इति॑ सं – ज्ञाने॑ । ए॒व । सं॒ज्ञान॑मि॒ति सं॒ज्ञान॑म् ।

हि । ए॒तत् । 15 (50)

TS 5.2.3.3

प॒शूनां॑ य॒दूषा॑ द्या॒वापृ॑थि॒वी स॒हाऽऽस्तां॑ ते वि॒यती॑ अ॒ब्रूता॑मस्त्वे॒व नौ॑
स॒ह य॒ज्ञिय॑मि॒ति यद॑मु॒ष्या य॒ज्ञिय॑मासीत् तद॒स्याम॑दधात् त ऊ॒षा
अ॒भवन्॑ यद॒स्या य॒ज्ञिय॑मासीत् तद॒मुष्या॑मदधात् तद॒द श्र॑न्द्रम॒सि
कृ॒ष्णमू॑षान् नि॒वप॑न्नदो ध्या॒येद् द्या॒वापृ॑थि॒व्योरे॒व य॒ज्ञिये॑ऽग्निं चि॒नु॒ते
ऽयं॑ सो अ॒ग्निरि॑ति वि॒श्वामि॑त्रस्य – [] 16

TS 5.2.3.3 - Padam

प॒शूना॑म् । यत् । ऊ॒षाः॑ । द्या॒वापृ॑थि॒वी इति॑ द्या॒वा – पृ॒थि॒वी । स॒ह ।
आ॒स्ता॑म् । ते इति॑ । वि॒यती॑ इति॑ वि – य॒ती । अ॒ब्रूता॑म् । अस्तु॑ ।
ए॒व । नौ॑ । स॒ह । य॒ज्ञिय॑म् । इति॑ । यत् । अ॒मुष्याः॑ । य॒ज्ञिय॑म् ।
आसी॑त् । तत् । अ॒स्याम् । अ॒दधा॑त् । ते । ऊ॒षाः॑ । अ॒भवन्॑ ।
यत् । अ॒स्याः॑ । य॒ज्ञिय॑म् । आसी॑त् । तत् । अ॒मुष्या॑म् । अ॒दधा॑त् ।

तत् । अ॒दः । च॒न्द्रम॑सि । कृ॒ष्णम् । ऊ॒षान् । नि॒वप॑न्निति नि-वपन् ।
अ॒दः । ध्या॒येत् । द्या॒वापृ॑थिव्योरिति द्यावा – पृ॒थि॒व्योः । ए॒व ।
य॒ज्ञि॒र्यै॑ । अ॒ग्निम् । चि॒नु॒ते । अ॒यम् । सः । अ॒ग्निः । इति॑ ।
वि॒श्वामि॑त्रस्येति वि॒श्व – मि॒त्रस्य॑ । 16 (50)

TS 5.2.3.4

सू॒क्तं भव॑त्येतेन वै वि॒श्वामि॑त्रोऽग्नेः प्रि॒यं धा॒मावा॑रुन्धाग्नेरेवैतेन प्रि॒यं
धा॒माव॑ रुन्धे छन्दोभिर्वै दे॒वाः सु॒वर्गं॑ लो॒कमा॑यन् चत॒स्रः प्रा॒चीरु॑प
दधा॑ति च॒त्वारि॑ छन्दाँ॒सि छन्दो॑भिरेव तद्-यज॑मानः सु॒वर्गं
लो॒कमे॑ति तेषाँ॒ सु॒वर्गं॑ लो॒कं य॑तां दि॒शः स॑मव्लीयन्त ते द्वे
पु॒रस्ता॑थ् स॒मीची॑ उपा॒दध॑त द्वे – [] 17

TS 5.2.3.4 - Padam

सू॒क्तमि॑ति सु – उ॒क्तम् । भव॑ति । ए॒तेन॑ । वै । वि॒श्वामि॑त्र इति॑
वि॒श्व – मि॒त्रः । अ॒ग्नेः । प्रि॒यम् । धा॒म । अ॒वेति॑ । अ॒रुन्ध॑ ।
अ॒ग्नेः । ए॒व । ए॒तेन॑ । प्रि॒यम् । धा॒म । अ॒वेति॑ । रु॒न्धे ।
छन्दो॑भिरिति छन्दः – भिः । वै । दे॒वाः । सु॒वर्गमि॑ति सुवः – गम् ।

लो॒कम् । आ॒यन् । च॒त॒स्रः । प्रा॒चीः । उ॒पेति॑ । द॒धा॒ति । च॒त्वा॒रि ।
छन्दा॑ँ॒सि । छन्दा॑भि॒रिति॑ छन्दः – भिः । ए॒व । तत् । यज॑मानः ।
सु॒व॒र्गमि॑ति सुवः – गम् । लो॒कम् । ए॒ति । तेषा॑म् । सु॒व॒र्गमि॑ति
सुवः – गम् । लो॒कम् । य॒ताम् । दि॒शः । स॒मि॒ति । अ॒व्ली॒यन्त॑ ।
ते । द्वे इति॑ । पु॒रस्ता॑त् । स॒मी॒ची इति॑ । उ॒पेति॑ । अ॒द॒धत॑ ।

द्वे इति॑ । 17 (50)

TS 5.2.3.5

प॒श्चात् स॒मी॒ची ताभि॑र्वै ते दि॒शोऽदृ॑हन् । यद् द्वे पु॒रस्ता॑त् स॒मी॒ची
उ॒प॒द॒धा॒ति द्वे प॒श्चात् स॒मी॒ची दि॒शां वि॑धृत्या अथो प॒श॒वो वै
छन्दा॑ँ॒सि प॒शू॒ने॒वास्मै॑ स॒मी॒चो द॒धा॒त्य॒ष्टावु॑प द॒धा॒त्य॒ष्टाक्ष॑रा गाय॒त्री
गा॒य॒त्रो ऽग्नि॑र्या॒वाने॒वाग्नि॑स्तं चि॒नु॒ते ऽष्टावु॑प द॒धा॒त्य॒ष्टाक्ष॑रा गाय॒त्री
गा॒य॒त्री सु॒व॒र्गं लो॒कम॑ज्जसा वेद सु॒व॒र्गस्य॑ लो॒कस्य॑ – [] 18

TS 5.2.3.5 - Padam

प॒श्चात् । स॒मी॒ची इति॑ । ताभिः॑ । वै । ते । दि॒शः । अ॒दृ॑हन् ।
यत् । द्वे इति॑ । पु॒रस्ता॑त् । स॒मी॒ची इति॑ । उ॒प॒द॒धा॒तीत्यु॑प – द॒धा॒ति ।

द्वे॑ इति॑ । प॒श्चात् । स॒मीची॑ इति॑ । दि॒शाम् । वि॒धृत्या॑ इति॑ वि॒धृत्यै॑ ।
 अथो॑ इति॑ । प॒शवः॑ । वै । छ॒न्दा॑सि । प॒शून् । ए॒व । अ॒स्मै ।
 स॒मीचः॑ । द॒धाति॑ । अ॒ष्टौ । उ॒पेति॑ । द॒धाति॑ । अ॒ष्टाक्ष॑रेत्य॒ष्टा-अ॒क्षरा॑ ।
 गा॒यत्री॑ । गा॒यत्रः॑ । अ॒ग्निः । या॒वान् । ए॒व । अ॒ग्निः । तम् । चि॒नुते॑ ।
 अ॒ष्टौ । उ॒पेति॑ । द॒धाति॑ । अ॒ष्टाक्ष॑रेत्य॒ष्टा-अ॒क्षरा॑ । गा॒यत्री॑ । गा॒यत्री॑ ।
 सु॒वर्ग॑मिति॑ सु॒वः - गम् । लो॒कम् । अ॒ज्जसा॑ । वे॒द ।
 सु॒वर्ग॑स्येति॑ सु॒वः - ग॒स्य । लो॒कस्य॑ । 18 (50)

TS 5.2.3.6

प्र॒ज्ञात्यै॑ त्रयो॑दश॒ लोकं॑पृ॒णा उप॑ द॒धात्ये॑कवि॒ंशतिः॑ सं प॒द्यन्ते॑
 प्र॒तिष्ठा॑ वा ए॒कवि॒ंशः प्र॒तिष्ठा॑ गा॒र्हप॑त्य ए॒कवि॒ंशस्यै॑व
 प्र॒तिष्ठां॑ गा॒र्हप॑त्यम॒नु प्र॒ति ति॑ष्ठति॒ प्रत्य॑ग्निं चि॒क्यान् स्ति॑ष्ठति॒ य
 ए॒वं वे॒द प॒ञ्चचि॑तीकं चि॒न्वीत॑ प्रथ॒मं चि॒न्वानः॑ पा॒ङ्क्तो य॒ज्ञः पा॒ङ्क्तः॑
 प॒शवो॑ य॒ज्ञमे॒व प॒शून्व॑ रु॒न्धे त्रि॑चि॒तीकं॑ चि॒न्वीत॑ द्वितीयं॑
 चि॒न्वान॑ स्त्रय॒ इमे॑ लो॒का ए॒ष्वे॒व लो॒केषु॑ - [] 19

TS 5.2.3.6 - Padam

प्र॒ज्ञा॒त्या इति॑ प्र – ज्ञा॒त्यै । त्रयो॑द॒शेति॑ त्रयः – द॒श ।
लो॒कंपृ॒णा इति॑ लो॒कं – पृ॒णाः । उपेति॑ । द॒धाति॑ ।
ए॒कवि॑ं॒शति॑रि॒त्येक॑ – वि॒ं॒शतिः॑ । स॒मिति॑ । प॒द्यन्ते॑ ।
प्र॒तिष्ठेति॑ प्र॒ति – स्था । वै । ए॒कवि॑ं॒श इत्ये॑क – वि॒ं॒शः ।
प्र॒तिष्ठेति॑ प्र॒ति – स्था । गा॒र्हप॑त्य इति॑ गा॒र्ह – प॒त्यः ।
ए॒कवि॑ं॒शस्ये॑त्ये॒क – वि॒ं॒शस्य॑ । ए॒व । प्र॒तिष्ठा॑मिति॑ प्र॒ति-स्था॑म् ।
गा॒र्हप॑त्यमिति॑ गा॒र्ह – प॒त्यम् । अ॒नु । प्र॒तीति॑ । तिष्ठति॑ । प्र॒तीति॑ ।
अ॒ग्निम् । चि॒क्या॒नः । तिष्ठति॑ । यः । ए॒वम् । वे॒द । पञ्च॑चि॒तीक॑मिति॑
पञ्च॑-चि॒तीक॑म् । चि॒न्वीत॑ । प्र॒थम॑म् । चि॒न्वा॒नः । पा॒ङ्कः । य॒ज्ञः ।
पा॒ङ्काः । प॒शवः॑ । य॒ज्ञम् । ए॒व । प॒शून् । अ॒वेति॑ । रु॒न्धे ।
त्रि॒चि॒तीक॑मिति॑ त्रि – चि॒तीक॑म् । चि॒न्वीत॑ । द्वि॒तीय॑म् । चि॒न्वा॒नः ।
त्रयः॑ । इ॒मे । लो॒काः । ए॒षु । ए॒व । लो॒केषु॑ । 19 (50)

TS 5.2.3.7

प्रति॑ तिष्ठत्येक॑चितीकं॑ चिन्वीत॑ तृतीयं॑ चिन्वान॑ एक॑धा वै सु॒वर्गो॑
लोक॑ एक॑वृ॒तैव॑ सु॒वर्गं॑ लो॒कमे॑ति॒ पुरी॑षेणा॒भ्यूह॑ति
तस्मा॑न्मा॒सेना॑स्थि॒ छन्नं॑ न दु॒श्चर्मा॑ भवति॒ य एवं॑ वेद॒ पञ्च॑ चित॒यो
भवन्ति॑ पञ्च॒भिः॒ पुरी॑षैर॒भ्यूह॑ति॒ दश॑ सं प॒द्यन्ते॑ दशा॒क्षरा॑ वि॒राडन्नं॑
वि॒राड् वि॒राज्ये॒वाऽन्नाद्ये॑ प्रति॑ तिष्ठति॑ ॥ 20

TS 5.2.3.7 - Padam

प्रतीति॑ । तिष्ठति॑ । एक॑चितीक॒मित्येक॑ – चितीक॒म् । चिन्वीत॑ ।
तृतीय॑म् । चिन्वानः॑ । एक॑धेत्येक॑ – धा । वै । सु॒वर्ग इति॑
सुवः॑ – गः । लोकः॑ । एक॑वृ॒तैत्येक॑ – वृता॑ । एव । सु॒वर्गमिति॑
सुवः॑ – गम् । लोक॑म् । एति॑ । पुरी॑षेण । अभीति॑ । ऊ॒हति॑ ।
तस्मा॑त् । मा॒सेन॑ । अस्थि॑ । छन्न॑म् । न । दु॒श्चर्मेति॑ दुः – चर्मा॑ ।
भवति॑ । यः । ए॒वम् । वेद॑ । पञ्च॑ । चित॒यः । भवन्ति॑ ।
पञ्च॒भिरिति॑ पञ्च – भिः । पुरी॑षैः । अभीति॑ । ऊ॒हति॑ । दश॑ ।
समिति॑ । प॒द्यन्ते॑ । दशा॒क्षरेति॑ दश – अ॒क्षरा॑ । वि॒राडिति॑ वि-राट् ।

अ॒न्नम् । वि॒राडि॑ति वि – रा॒ट् । वि॒राजी॑ति वि – रा॒जि । ए॒व ।

अ॒न्नाद्य॑ इत्य॒न्न – अ॒द्ये । प्र॒तीति॑ । ति॒ष्ठति॑ ॥ 20 (47)

(अ॒द्ध्यव॑साय॒यति॑ – ह्ये॒त – द्वि॒श्वामि॑त्र॒स्या – द॒धत॑ द्वे – लो॒कस्य॑
– लो॒केषु॑ – स॒प्तच॑त्वारि॒ंशच्च॑) (A3)

TS 5.2.4.1

वि वा ए॒तौ द्वि॑षाते॒ यश्च॑ पु॒रा ऽग्नि॑र्यश्चो॒खाया॑ ॥ स॒मित॑मि॒ति च॑त॒सृभिः॑
सं नि व॑पति च॒त्वारि॑ छन्दा॒ंसि छन्दा॑ंसि खलु॒ वा अ॒ग्नेः प्रि॒या
त॒नूः प्रि॒ययै॑वैनौ त॒नुवा॑ स ॥ शा॒स्ति स॒मित॑मि॒त्याह॑ तस्माद्ब्र॒ह्मणा॑
क्ष॒त्रं स॒मेति॑ यथ् सं॒न्युप्य॑ वि॒हरति॑ तस्माद् ब्र॒ह्मणा॑

क्ष॒त्रं व्यै॑त्य॒तुभिः॑ – [] 21

TS 5.2.4.1 - Padam

वी॒ति । वै । ए॒तौ । द्वि॑षाते॒ इति॑ । यः । च । पु॒रा । अ॒ग्निः । यः ।
च । उ॒खाया॑म् । स॒मिति॑ । इ॒तम् । इति॑ । च॒त॒सृभि॑रिति॒ च॒त॒सृ-भिः॑ ।
सम् । नी॒ति । व॑पति । च॒त्वारि॑ । छन्दा॒ंसि । छन्दा॑ंसि । खलु॒ ।
वै । अ॒ग्नेः । प्रि॒या । त॒नूः । प्रि॒यया॑ । ए॒व । ए॒नौ । त॒नुवा॑ । स॒मिति॑ ।

शा॒स्ति॒ । समि॑ति॒ । इ॒तम् । इति॑ । आ॒ह॒ । तस्मा॑त् । ब्र॒ह्म॑णा । क्ष॒त्रम् ।

समि॑ति॒ । ए॒ति॒ । यत् । सं॒न्यु॒प्येति॑ सं – न्यु॒प्य॑ ।

वि॒हर॒तीति॑ वि – हर॑ति । तस्मा॑त् । ब्र॒ह्म॑णा । क्ष॒त्रम् । वी॒ति॑ । ए॒ति॒ ।

ऋ॒तुभि॒रित्यृ॒तु – भिः॑ । 21 (50)

TS 5.2.4.2

–वा॑ ए॒तं दी॒क्षय॑न्ति॒ स ऋ॒तुभि॒रेव॑ वि॒मुच्यो॑ मा॒तेव॑ पु॒त्रं पृ॒थि॒वी
पु॒री॒ष्यमि॒त्याह॑ – तु॒भि॒रेवैनं॑ दी॒क्षयि॑त्व॒तुभि॒र्वि मु॒ञ्चति॑ वै॒श्वान॑र्या
शि॒क्य॒मा द॑त्ते स्व॒दय॑त्ये॒वैन॑ – न्नैर्ऋ॒तीः कृ॒ष्णा – स्ति॒स्र – स्तु॒षप॑क्वा
भव॑न्ति॒ निर्ऋ॑त्यै॒ वा ए॒तद् – भा॒गधे॑यं॒ यत् तु॒षा निर्ऋ॑त्यै॒ रूपं॑ कृ॒ष्णं
रू॒पेणै॒व निर्ऋ॑तिं॒ नि॒रव॑दय॒त इ॒मां दि॒शं य॑न्त्ये॒षा – [] 22

TS 5.2.4.2 - Padam

वै । ए॒तम् । दी॒क्षय॑न्ति॒ सः । ऋ॒तुभि॒रित्यृ॒तु – भिः॑ । ए॒व । वि॒मुच्य॑
इति॑ वि – मु॒च्यः॑ । मा॒ता । इ॒व । पु॒त्रम् । पृ॒थि॒वी । पु॒री॒ष्यम् । इति॑ ।

आ॒ह॒ । ऋ॒तुभि॒रित्यृ॒तु – भिः॑ । ए॒व । ए॒नम् । दी॒क्षयि॑त्वा ।

ऋ॒तुभि॒रित्यृ॒तु – भिः॑ । वी॒ति॑ । मु॒ञ्चति॑ । वै॒श्वान॑र्या । शि॒क्यम् । ए॒ति॒ ।

द॒त्ते । स्व॒द॒य॒ति॒ । ए॒व । ए॒न॒त् । नै॒र्ऋ॒ती॒रि॒ति॒ नैः-ऋ॒तीः । कृ॒ष्णाः ।
 ति॒स्रः । तु॒ष॒प॒क्वा॒ इति॒ तु॒ष - प॒क्वाः । भ॒व॒न्ति॒ ।
 नि॒र्ऋ॒त्या॒ इति॒ निः - ऋ॒त्यै । वै । ए॒त॒त् । भा॒ग॒धे॒य॒मि॒ति॒
 भा॒ग - धे॒य॒म् । य॒त् । तु॒षाः । नि॒र्ऋ॒त्या॒ इति॒ निः-ऋ॒त्यै । रू॒प॒म् ।
 कृ॒ष्ण॒म् । रू॒पे॒ण । ए॒व । नि॒र्ऋ॒ति॒मि॒ति॒ निः - ऋ॒ति॒म् । नि॒र॒व॒द॒य॒त
 इति॒ निः - अ॒व॒द॒य॒ते । इ॒माम् । दि॒श॒म् । य॒न्ति॒ । ए॒षा । 22 (50)

TS 5.2.4.3

वै नि॒र्ऋ॒त्यै दिक् स्वा॒यामे॒व दि॒शि नि॒र्ऋ॒तिं नि॒र॒व॒द॒य॒ते स्व॒कृ॒त
 इ॒रि॒ण उप॑ द॒धाति॒ प्र॒द॒रे वै॒तद् वै नि॒र्ऋ॒त्या आ॒य॒त॒न॒ऽ स्व॒ ए॒वाऽऽ*
 य॒त॒ने नि॒र्ऋ॒तिं नि॒र॒व॒द॒य॒ते शि॒क्य॒म॒भ्यु॒प द॒धाति॒ नै॒र्ऋ॒तो वै पा॒शः
 सा॒क्षादे॒वैनं॑ नि॒र्ऋ॒तिपा॒शान्-मु॒ञ्च॒ति ति॒स्र उप॑ द॒धाति॒ त्रे॒धावि॒हि॒तो
 वै पु॒रु॒षो या॒वा॒ने॒व पु॒रु॒ष॒स्तस्मा॑न्-नि॒र्ऋ॒ति॒म॒व य॒ज॒ते
 प॒रा॒ची॒रु॒प-[] 23

TS 5.2.4.3 - Padam

वै । निर्ऋत्या इति निः – ऋत्यै । दिक् । स्वायाम् । एव । दिशि ।
निर्ऋतिमिति निः – ऋतिम् । निरवदयत इति निः – अवदयते ।
स्वकृत इति स्व – कृते । इरिणे । उपेति । दधाति । प्रदर इति
प्र – दरे । वा । एतत् । वै । निर्ऋत्या इति निः – ऋत्याः ।
आयतनमित्या – यतनम् । स्वे । एव । आयतन इत्या – यतने ।
निर्ऋतिमिति निः – ऋतिम् । निरवदयत इति निः – अवदयते ।
शिव्यम् । अभि । उपेति । दधाति । नैर्ऋत इति नैः – ऋतः । वै ।
पाशः । साक्षादिति स – अक्षात् । एव । एनम् । निर्ऋतिपाशादिति
निर्ऋति – पाशात् । मुञ्चति । तिस्रः । उपेति । दधाति ।
त्रेधाविहित इति त्रेधा – विहितः । वै । पुरुषः । यावान् । एव ।
पुरुषः । तस्मात् । निर्ऋतिमिति निः – ऋतिम् । अवेति । यजते ।
पराचीः । उपेति । 23 (50)

TS 5.2.4.4

दधाति॑ परा॒चीमे॒वास्मान्-निर्ऋ॑तिं प्र णु॒दते॑ ऽप्र॒तीक्ष॒मा य॑न्ति
निर्ऋ॑त्या अ॒न्तर्हि॒त्यै मार्ज॑यित्वा॒प तिष्ठ॑न्ते मे॒द्ध्य॒त्वाय॑
गार्ह॑पत्यमु॒प तिष्ठ॑न्ते निर्ऋ॑तिलो॒क ए॒व चरि॑त्वा पू॒ता
दे॒वलोक॑मु॒पाव॑र्तन्त॒ एक॒योप॑ तिष्ठन्त॒ एक॒धैव॑ यज॒माने॑ वी॒र्यं॑ दधति
नि॒वेश॑नः स॒ङ्गम॑नो व॒सूना॒मित्या॑ह प्र॒जा वै प॒शवो॑ वसु॒ प्रज॑यै॒वैनं॑
प॒शुभिः॑ सम॒र्दध॑यन्ति ॥ 24

TS 5.2.4.4 - Padam

दधा॑ति । परा॒चीम् । ए॒व । अ॒स्मात् । निर्ऋ॑तिमि॒ति निः - ऋ॒तिम् ।
प्रेति॑ । नु॒दते॑ । अ॒प्रतीक्ष॑मित्य॒प्रति - ईक्ष॑म् । ए॒ति । य॒न्ति ।
निर्ऋ॑त्या इति॒ निः - ऋ॒त्याः । अ॒न्तर्हि॒त्या इत्य॑न्तः - हि॒त्यै ।
मार्ज॑यित्वा । उ॒पेति॑ । तिष्ठ॑न्ते । मे॒द्ध्य॒त्वायेति॑ मे॒द्ध्य - त्वाय॑ ।
गार्ह॑पत्यमि॒ति गार्ह॑ - प॒त्यम् । उ॒पेति॑ । तिष्ठ॑न्ते । निर्ऋ॑तिलो॒क
इति॑ निर्ऋ॑ति - लो॒के । ए॒व । चरि॑त्वा । पू॒ताः । दे॒वलोक॑मि॒ति
दे॒व - लोक॑म् । उ॒पाव॑र्तन्त॒ इत्यु॑प - आ॒वर्त॑न्ते । ए॒कया॑ । उ॒पेति॑ ।

तिष्ठन्ते । एक॑धेत्ये॒क – धा । ए॒व । यज॑माने । वी॒र्य॑म् । द॒धति॑ ।
नि॒वेश॑न इति नि-वेश॑नः । स॒ङ्ग॑म॒न इति॑ सं- गम॑नः । व॒सूना॑म् ।
इति॑ । आ॒ह । प्र॒जेति॑ प्र – जा । वै । प॒शवः॑ । व॒सु ।
प्र॒जयेति॑ प्र – जया॑ । ए॒व । ए॒नम् । प॒शुभि॑रिति प॒शु – भिः॑ ।
स॒मिति॑ । अ॒र्द्धय॑न्ति ॥ 24 (48)

(ऋ॒तुभि॑ – रे॒षा- परा॑चीरु॒पा – षा॑च॒त्वारि॑ञ्श॒च्च) (A4)

TS 5.2.5.1

पु॒रुष॑मा॒त्रेण॑ वि मि॒मीते॑ य॒ज्ञेन॑ वै पु॒रुषः॑ संमि॒तो य॒ज्ञप॑रुषै॒वैनं॑ वि
मि॒मीते॑ या॒वान् पु॒रुष॑ ऊ॒र्ध्वबा॑हु॒स्तावा॑न् भव॒त्येता॑वद् वै पु॒रुषे॑ वी॒र्यं॑
वी॒र्येणै॒वैनं॑ वि मि॒मीते॑ प॒क्षी भ॑वति न ह्य॒पक्षः॑ पति॒तु-म॑र्ह॒त्यर॑न्निना
प॒क्षौ द्रा॑घीया॒सौ भ॑वत॒स्तस्मा॑त् प॒क्षप्र॑वया॒सि वया॑सि
व्याम॑मात्रौ प॒क्षौ च॑ पु॒च्छं च॑ भव॒त्येता॑वद् वै पु॒रुषे॑ वी॒र्यं॑ –[] 25

TS 5.2.5.1 - Padam

पु॒रुष॑मा॒त्रेणेति॑ पु॒रुष – मा॒त्रेण॑ । वी॒ति । मि॒मीते॑ । य॒ज्ञेन॑ । वै ।
पु॒रुषः॑ । संमि॒त इति॑ सं – मि॒तः । य॒ज्ञप॑रुषेति॑ य॒ज्ञ-प॑रुषा॑ । ए॒व ।

ए॒नम् । वी॒ति॑ । मि॒मी॒ते॑ । या॒वान् । पु॒रु॒षः ।
ऊ॒र्ध्व॒बा॒हु॒रित्यु॒र्ध्व॒-बा॒हुः॑ । ता॒वान् । भ॒व॒ति॑ । ए॒ता॒वत् । वै । पु॒रु॒षे ।
वी॒र्य॑म् । वी॒र्ये॑ण । ए॒व । ए॒नम् । वी॒ति॑ । मि॒मी॒ते॑ । प॒क्षी॑ । भ॒व॒ति॑ । न ।
हि । अ॒पक्षः॑ । प॒ति॒तुम् । अ॒र्ह॒ति॑ । अ॒र॒न्नि॒ना॑ । प॒क्षौ॑ । द्रा॒घी॒या॒सौ॑ ।
भ॒व॒तः॑ । तस्मा॑त् । प॒क्षप्र॑वया॒सी॒ति॑ प॒क्ष - प्र॑वया॒सि॑ । वया॒सि॑ ।
व्या॒म॒मा॒त्रा॒वि॒ति॑ व्या॒म - मा॒त्रौ॑ । प॒क्षौ॑ । च॒ । पु॒च्छ॑म् । च॒ । भ॒व॒ति॑ ।
ए॒ता॒वत् । वै । पु॒रु॒षे । वी॒र्य॑म् । 25 (50)

TS 5.2.5.2

वी॒र्य॑सं॒मितो॑ वे॒णु॒ना॒ वि॒ मि॒मी॒त॑ आ॒ग्ने॒यो॒ वै वे॒णुः॑ स॒यो॒नि॒त्वा॒य॒
य॒जु॒षा॒ यु॒न॒क्ति॑ य॒जु॒षा॒ कृ॒ष॒ति॑ व्या॒वृ॒त्यै॑ ष॒ड्ग॒वे॒न॑ कृ॒ष॒ति॑ ष॒ड् वा॒
ऋ॒त॒व॑ ऋ॒तु॒भि॒रे॒वैनं॑ कृ॒ष॒ति॑ यद् द्वा॒द॒श॒ग॒वे॒न॑ सँव॒थ्स॒रे॒णै॒वे॒ यं वा॑
अ॒ग्ने॒-र॒ति॒दा॒हा॒द॒बि॒भे॒त् सै॒तद् द्वि॒गु॒ण॒म॒प॒श्य॒त् कृ॒ष्टं॑ चा॒कृ॒ष्टं॑
च॒ ततो॑ वा इ॒मां॑ ना॒त्य॒द॒ह॒द्-य॒त् कृ॒ष्टं॑ चा॒कृ॒ष्टं॑ च॒ - [] 26

TS 5.2.5.2 - Padam

वी॒र्य॑स॒मि॒त इति॑ वी॒र्य॑ – स॒मि॒तः । वे॒णु॑ना । वी॒ति॑ । मि॒मी॒ते ।
आ॒ग्ने॒यः । वै । वे॒णुः । स॒यो॒नि॒त्वा॒येति॑ स॒यो॒नि॒ – त्वा॒य ।
य॒जु॒षा । यु॒न॒क्ति॑ । य॒जु॒षा । कृ॒ष॒ति॑ । व्या॒वृ॒त्त्या इति॑ वि – आ॒वृ॒त्त्यै ।
ष॒ङ्ग॒वे॒नेति॑ षट् – ग॒वे॒न । कृ॒ष॒ति॑ । षट् । वै । ऋ॒त॒वः ।
ऋ॒तु॒भि॒रि॒त्यु॒तु – भिः॑ । ए॒व । ए॒न॒म् । कृ॒ष॒ति॑ । यत् । द्वा॒द॒श॒ग॒वे॒नेति॑
द्वा॒द॒श – ग॒वे॒न । सँ॒व॒थ्स॒रे॒णेति॑ सं – व॒थ्स॒रे॒ण । ए॒व । इ॒य॒म् । वै ।
अ॒ग्नेः॑ । अ॒ति॒दा॒हा॒दि॒त्यति॑ – दा॒हात् । अ॒भि॒भे॒त् । सा । ए॒त॒त् ।
द्वि॒गु॒ण॒मि॒ति॑ द्वि – गु॒ण॒म् । अ॒प॒श्य॒त् । कृ॒ष्ट॒म् । च । अ॒कृ॒ष्ट॒म् । च ।
त॒तः । वै । इ॒माम् । न । अ॒ती॒ति॑ । अ॒द॒ह॒त् । यत् । कृ॒ष्ट॒म् । च ।
अ॒कृ॒ष्ट॒म् । च । 26 (50)

TS 5.2.5.3

भ॒व॒त्य॒स्या अ॒न॒ति॒दा॒हा॒य द्वि॒गु॒णं॑ त्वा अ॒ग्नि॑-मु॒द्य॒न्तु-म॒र्ह॒ती॒त्याहु॒र्यत्
कृ॒ष्टं॑ चा॒कृ॒ष्टं॑ च भ॒व॒त्य॒ग्ने॒रु॒द्य॒त्या ए॒ता॒व॒न्तो॒ वै प॒श॒वो॑ द्वि॒पा॒दश्च॑
च॒तु॒ष्पा॒दश्च॑ तान्॒ यत् प्रा॒च उ॒थ्सृ॒जेद्-रु॒द्रा॒या॒पि द॒द्ध्य॒द्-यद्-

दक्षिणा॑ पित॑रभ्यो॒ नि धु॑वेद्-यत् प्र॒तीचो॑ रक्षा॑सि ह॒न्युरु॑दी॒च
उ॒थ् सृ॑जत्येषा॒ वै दे॑वमनु॒ष्याणा॑ शान्ता॒ दिक् - [] 27

TS 5.2.5.3 - Padam

भव॑ति । अ॒स्याः । अन॑तिदाहा॒येत्य॑नति - दा॒हाय॑ । द्वि॒गुण॑मिति
द्वि - गु॒णम् । तु । वै । अ॒ग्निम् । उ॒द्यन्तु॑मित्युत्-य॒न्तुम् । अ॒र्हति॑ ।
इति॑ । आ॒हुः । यत् । कृ॒ष्टम् । च । अ॒कृष्टम् । च । भव॑ति । अ॒ग्नेः ।
उ॒द्यत्या॑ इत्युत् - य॒त्यै । ए॒ताव॑न्तः । वै । प॒शवः॑ । द्वि॒पाद॑ इति
द्वि - पा॒दः । च । चतु॑ष्पाद॒ इति॑ चतुः - पा॒दः । च । तान् । यत् ।
प्रा॒चः । उ॒थ्सृ॑जेदित्युत् - सृ॒जेत् । रु॒द्राय॑ । अ॒पीति॑ । द॒द्ध्यात् ।
यत् । द॒क्षिणा॑ । पि॒तृभ्य॑ इति॑ पि॒तृ - भ्यः॑ । नीति॑ । धु॒वेत् । यत् ।
प्र॒तीचः॑ । रक्षा॑सि । ह॒न्युः । उ॒दीचः॑ । उ॒दिति॑ । सृ॒जति॑ । ए॒षा ।
वै । दे॒वमनु॑ष्याणा॒मिति॑ दे॒व - मनु॑ष्याणा॒म् । शान्ता॑ । दिक् । 27 (50)

TS 5.2.5.4

तामे॒वैना॒ननू॑थ् सृ॒जत्य॑थो॒ खल्वि॒मां दि॒शमु॑थ् सृ॒जत्य॑सौ वा आ॒दित्यः॑
प्रा॒णः प्रा॒णमे॒वैना॒ननू॑थ् सृ॒जति॑ दक्षिणा॒ पर्या॑वर्तन्ते॒ स्वमे॒व वी॒र्य॑मनु॒

पर्या॑वर्त॒न्ते तस्मा॑द्-दक्षि॒णो ऽर्द्ध॑ आ॒त्मनो॑ वी॒र्या॑वत्तरो ऽथो॑
 आ॒दित्य॑स्यै॒वाऽऽवृ॑तमनु पर्या॑वर्त॒न्ते तस्मा॑त् परा॒ञ्चः प॒शवो॑
 वि ति॑ष्ठन्ते प्र॒त्यञ्च॑ आ वर्त॑न्ते तिस्र॑स्ति॒स्रः सीताः॑ – [] 28

TS 5.2.5.4 - Padam

ताम् । ए॒व । ए॒नान् । अ॒नु । उ॒दि॒ति । सृ॒ज॒ति । अ॒थो इति॑ । ख॒लु ।
 इ॒माम् । दि॒शम् । उ॒दि॒ति । सृ॒ज॒ति । अ॒सौ । वै । आ॒दि॒त्यः । प्रा॒ण
 इति॑ प्र – अ॒नः । प्रा॒णमि॑ति प्र – अ॒नम् । ए॒व । ए॒नान् । अ॒नु ।
 उ॒दि॒ति । सृ॒ज॒ति । दक्षि॒णा । पर्या॑वर्त॒न्त इति॑ परि – आ॒वर्त॑न्ते ।
 स्वम् । ए॒व । वी॒र्यम् । अ॒न्वि॒ति । पर्या॑वर्त॒न्त इति॑ परि – आ॒वर्त॑न्ते ।
 तस्मा॑त् । दक्षि॒णः । अ॒र्द्धः । आ॒त्मनः॑ । वी॒र्या॑वत्तर इति॑
 वी॒र्या॑वत् – त॒रः । अ॒थो इति॑ । आ॒दि॒त्यस्य॑ । ए॒व ।
 आ॒वृ॒तमि॒त्या – वृ॒तम् । अ॒न्वि॒ति । पर्या॑वर्त॒न्त इति॑ परि-आ॒वर्त॑न्ते ।
 तस्मा॑त् । परा॒ञ्चः । प॒शवः॑ । वी॒ति । ति॑ष्ठन्ते । प्र॒त्यञ्चः॑ । ए॒ति ।
 वर्त॑न्ते । तिस्र॑स्ति॒स्र इति॑ तिस्रः – तिस्रः॑ । सीताः॑ । 28 (50)

TS 5.2.5.5

कृषति॑ त्रिवृ॑तमे॒व य॑ज्ञमु॒खे वि॑ या॒तय॑त्योष॒धीर्व॑पति॒ ब्र॒ह्म॒णाऽन्न॑म॒व रु॒न्धे
ॐ॑ ॐ॑-श्री॑यते चतु॒र्दश॑भिर्वपति॒ सप्त॑ ग्रा॒म्या ओष॑धयः स॒प्ताऽऽर॑ण्या
उ॒भयी॑षाम॒वरु॑द्ध्य॒ अन्न॑स्यान्नस्य॒ वप॑त्यन्नस्यान्नस्या॒वरु॑द्ध्यै कृ॒ष्टे
वपति॑ कृ॒ष्टे ह्योष॑धयः प्र॒तिति॑ष्ठन्त्यनु॒सीतं॑ वपति॒ प्रजा॑त्यै द्वा॒दश॑सु
सी॒तासु॑ वपति॒ द्वा॒दश॑ मा॒साः सँव॑त्सरः सँव॑त्सरेणै॒वास्मा॑
अन्नं॑ पचति॒ यद॑ग्निचि - [] 29

TS 5.2.5.5 - Padam

कृ॒षति॑ । त्रि॒वृ॒तमि॑ति त्रि - वृ॒तम् । ए॒व । य॒ज्ञमु॒ख इति॑ य॒ज्ञ-मु॒खे ।
वी॑ति । या॒तय॑ति । ओष॑धीः । व॒पति॑ । ब्र॒ह्म॒णा । अन्न॑म् । अ॒वेति॑ ।
रु॒न्धे । अ॒र्के । अ॒र्कः । ची॒यते॑ । चतु॒र्दश॑भि॒रिति॑ चतु॒र्दश॑ - भिः ।
व॒पति॑ । सप्त॑ । ग्रा॒म्याः । ओष॑धयः । सप्त॑ । आ॒रण्याः॑ । उ॒भयी॑षाम् ।
अ॒वरु॑द्ध्य॒ इत्य॑व - रु॒द्ध्यै । अन्न॑स्यान्नस्येत्यन्नस्य - अन्न॑स्य ।
व॒पति॑ । अन्न॑स्यान्नस्येत्यन्नस्य-अन्न॑स्य । अ॒वरु॑द्ध्य॒ इत्य॑व-रु॒द्ध्यै ।
कृ॒ष्टे । व॒पति॑ । कृ॒ष्टे । हि । ओष॑धयः । प्र॒तिति॑ष्ठन्तीति॒ प्रति॑-तिष्ठन्ति ।

अनु॒सी॒तमि॒त्यनु॑ – सी॒तम् । व॒पति॑ । प्र॒जा॒त्या॒ इति॑ प्र – जा॒त्यै ।
 द्वा॒दश॑स्वि॒ति द्वा॒दश॑ – सु॒ । सी॒ता॒सु । व॒पति॑ । द्वा॒दश॑ । मा॒साः ।
 सँ॒व॒थ्स॒र इति॑ सं – व॒थ्स॒रः । सँ॒व॒थ्स॒रेणे॑ति॒ सं – व॒थ्स॒रेण॑ । ए॒व ।
 अ॒स्मै । अ॒न्नम् । प॒चति॑ । यत् । अ॒ग्नि॒चि॒दि॒त्यग्नि॑ – चि॒त् । 29 (50)

TS 5.2.5.6

–द॒नव॑रु॒द्धस्या॑–अ॒जी॒याद॑व–रु॒द्धेन॑ व्यृ॒द्ध्येत॑ ये व॒नस्प॑ती॒नां
 फ॒ल॒ग्र॒हय॑–स्तानि॒द्धमे॑ ऽपि॒ प्रोक्षे॑–द॒नव॑रु॒द्धस्या॑–व॒रु॒द्ध्यै दि॒ग्भ्यो
 लो॒ष्टान्त् सम॑स्यति दि॒शामे॒व वी॒र्य॑म॒व॒रु॒द्ध्य दि॒शां वी॒र्यं॑ ऽग्निं चि॒नुते॑
 यं द्वि॒ष्ट्याद्–यत्र॑ स स्यात् तस्यै दि॒शो लो॒ष्टमा॑ ह॒रेदि॑ष–मूर्ज॑म॒हमि॑त
 आ द॒द इ॒तीष॑मे॒वोर्जं॑ तस्यै दि॒शोऽव॑ () रु॒न्धे क्षो॑धु॒को भव॑ति
 यस्तस्यां दि॒शि भव॑त्यु॒त्तर॑वेदिमु॒प व॑पत्यु॒त्तर॑वेद्या॒ ह्यग्नि॑श्ची॒यते॑ ऽथो
 प॒शवो॑ वा उ॒त्तर॑वेदिः प॒शूने॒वाव रु॒न्धेऽथो॑ य॒ज्ञप॑रु॒षोऽन॑न्तरि॒त्यै ॥ 30

TS 5.2.5.6 - Padam

अ॒न॒व॒रु॒द्धस्ये॑त्य॒न॒व–रु॒द्धस्य॑ । अ॒अ॒जी॒यात् । अ॒व॒रु॒द्धेने॑त्य॒व – रु॒द्धेन॑ ।
 वी॒ति । ऋ॒द्ध्येत॑ । ये । व॒न॒स्प॒तीना॑म् । फ॒ल॒ग्र॒हय॑ इति॑ फ॒ल–ग्र॒हयः॑ ।

तान् । इ॒ध्मे । अ॒पि । प्रे॒ति । उ॒क्षेत् । अ॒न॒व॒रु॒द्ध॒स्ये॒त्य॒न॒व॒रु॒द्ध॒स्य॒ ।
 अ॒व॒रु॒द्ध्या॒ इ॒त्य॒व॒रु॒द्ध्यै॒ । दि॒ग्भ्य॒ इति॑ दिक् – भ्यः॑ । लो॒ष्टान् ।
 स॒मि॒ति॑ । अ॒स्य॒ति॑ । दि॒शाम् । ए॒व । वी॒र्य॑म् । अ॒व॒रु॒द्ध्ये॒त्य॒व॒रु॒द्ध्य॑ ।
 दि॒शाम् । वी॒र्य॑म् । अ॒ग्नि॒म् । चि॒नु॒ते॒ । य॒म् । द्वि॒ष्ट्यात् । य॒त्र । सः॑ ।
 स्यात् । तस्यै॑ । दि॒शः । लो॒ष्टम् । ए॒ति॑ । ह॒रेत् । इ॒षम् । ऊ॒र्ज॑म् ।
 अ॒हम् । इ॒तः । ए॒ति॑ । द॒दे॒ । इ॒ति॑ । इ॒षम् । ए॒व । ऊ॒र्ज॑म् । तस्यै॑ ।
 दि॒शः । अ॒वे॒ति॑ () । रु॒न्धे॒ । क्षो॒धु॒कः॑ । भ॒व॒ति॑ । यः॑ । तस्या॑म् ।
 दि॒शि॑ । भ॒व॒ति॑ । उ॒त्तर॒वे॒दि॒मित्यु॑त्तर – वे॒दि॒म् । उ॒पे॒ति॑ । व॒प॒ति॑ ।
 उ॒त्तर॒वे॒द्या॒मित्यु॑त्तर – वे॒द्या॒म् । हि॒ । अ॒ग्निः॑ । ची॒य॒ते॑ । अ॒थो॒ इति॑ ।
 प॒श॒वः॑ । वै । उ॒त्तर॒वे॒दि॒रित्यु॑त्तर – वे॒दिः॑ । प॒शून् । ए॒व । अ॒वे॒ति॑ ।
 रु॒न्धे॒ । अ॒थो॒ इति॑ । य॒ज्ञ॒प॒रु॒ष॒ इति॑ य॒ज्ञ – प॒रु॒षः॑ ।
 अ॒न॒न्तरि॒त्या॒ इ॒त्य॒न॒न्तः॑ – इ॒त्यै॑ ॥ 30 (75)

(च॒ भ॒व॒त्ये॒ता॒व॒द्वै॒ पुरु॑षे वी॒र्य॑ – य॒त्कृ॑ष्ट॒ञ्चा॒कृ॑ष्ट॒ञ्च – दि॒ख् – सी॒ता॑
 – अ॒ग्नि॒चि॑ – द॒व – प॒ञ्च॒वि॒ंश॒तिश्च॑) (A5)

TS 5.2.6.1

अग्ने॑ तव॑ श्रवो॑ वय॑ इति॑ सिक्ता॑ नि वपत्ये॑तद् वा अग्ने॑वै॑श्चानर॑स्य
सूक्त॑ꣳ सूक्ते॑नैव॑ वै॑श्चानर॑मव॑ रुन्धे॑ षड्भि॑र्नि वपति॑ षट् वा ऋ॒तवः॑
सँव॑त्सरः॑ सँव॑त्सरो॑ऽग्नि॑वै॑श्चानरः॑ साक्षा॑देव॑ वै॑श्चानर॑-मव॑ रुन्धे॑
समु॑द्रं वै॑ नामै॑तच्छन्दः॑ समु॑द्रमनु॑ प्रजाः॑ प्र जाय॑न्ते यदे॒तेन॑ सिक्ता॑
निव॑पति॑ प्रजानां॑ प्रज॑ननायेन्द्रो॑ – [] 31

TS 5.2.6.1 - Padam

अग्ने॑ । तव॑ । श्रवः॑ । वयः॑ । इति॑ । सिक्ताः॑ । नीति॑ । वपति॑ ।
एतत् । वै । अग्नेः॑ । वै॑श्चानर॑स्य । सूक्तमि॑ति सु – उक्तम् ।
सूक्ते॑नेति॑ सु – उक्ते॑न । एव । वै॑श्चानर॑म् । अवेति॑ । रुन्धे॑ ।
षड्भि॑रिति॑ षट् – भिः । नीति॑ । वपति॑ । षट् । वै । ऋ॒तवः॑ ।
सँव॑त्सर इति॑ सं – वत्सरः॑ । सँव॑त्सर इति॑ सं – वत्सरः॑ ।
अग्निः॑ । वै॑श्चानरः॑ । साक्षा॑दिति॑ स – अक्षात् । एव । वै॑श्चानर॑म् ।
अवेति॑ । रुन्धे॑ । समु॑द्रम् । वै । नाम॑ । एतत् । छन्दः॑ । समु॑द्रम् ।
अन्वि॑ति । प्रजा॑ इति॑ प्र – जाः । प्रेति॑ । जाय॑न्ते । यत् । एते॑न ।

सि॒क्र॒ताः । नि॒व॒प॒ती॒ति॒ नि – व॒प॒ति॒ । प्र॒जा॒ना॒मि॒ति॒ प्र – जा॒ना॒म् ।

प्र॒ज॒न॒ना॒ये॒ति॒ प्र – ज॒न॒ना॒य॒ । इन्द्रः॑ । 31 (50)

TS 5.2.6.2

वृ॒त्राय॑ व॒ज्रं॑ प्रा॒ह॒र॒थ् स त्रे॒धा व्य॑भव॒थ् स्फ्य॑ स्तृ॒ती॒य॒ꣳ रथ॑ स्तृ॒ती॒य॒ꣳ
यू॒प॒स्तृ॒ती॒य॒ꣳ ये॑ऽन्त॒श्श॒रा अ॒शी॒र्य॑न्त॒ ताः श॒र्क॒रा अभ॑वन्
तच्छ॒र्क॒राणा॑ꣳ श॒र्क॒र॒त्वं व॑ज्रो॒ वै श॒र्क॒राः प॒शु॒र॒ग्नि॒-र्यच्छ॒र्क॒राभि॑र॒ग्निं
परि॑मि॒नो॒ति॒ वज्रे॑णै॒वास्मै॑ प॒शून् परि॑ गृह्णा॒ति॒ तस्मा॑द्-वज्रे॑ण प॒श॒वः
परि॑गृही॒तास्त॑स्मा॒थ् स्थे॒यान॑स्थे॒यसो॑ नोप॑ ह॒र॒ते त्रि॑स॒प्ताभिः॑

प॒शु॒का॒म॒स्य॑- [] 32

TS 5.2.6.2 - Padam

वृ॒त्राय॑ । व॒ज्र॑म् । प्रे॒ति॒ । अ॒ह॒र॒त् सः । त्रे॒धा । वी॒ति॒ । अ॒भ॒व॒त् ।
स्फ्यः॑ । तृ॒ती॒य॒म् । रथः॑ । तृ॒ती॒य॒म् । यू॒पः । तृ॒ती॒य॒म् । ये ।
अ॒न्त॒श्श॒रा इत्य॑न्तः-श॒राः । अ॒शी॒र्य॑न्त॒ ताः । श॒र्क॒राः । अ॒भ॒व॒न् ।
तत् । श॒र्क॒राणा॑म् । श॒र्क॒र॒त्वमि॑ति॒ श॒र्क॒र – त्वम् । व॒ज्रः । वै ।
श॒र्क॒राः । प॒शुः । अ॒ग्निः । यत् । श॒र्क॒राभिः॑ । अ॒ग्नि॑म् ।

परि॑मिनो॒तीति॑ परि – मि॒नोति॑ । वज्र॑ेण । ए॒व । अ॒स्मै । प॒शून् ।
परी॑ति । गृ॒ह्णाति॑ । तस्मा॑त् । वज्र॑ेण । प॒शवः॑ । परि॑गृही॒ता इति॑
परि॑ – गृ॒हीताः॑ । तस्मा॑त् । स्थे॒यान् । अस्थे॑यसः । न । उपे॑ति ।
हर॑ते । त्रि॒सप्ता॑भिरिति॑ त्रि – सप्ता॑भिः ।
प॒शुका॑म॒स्येति॑ प॒शु – का॒मस्य॑ । 32 (50)

TS 5.2.6.3

परि॑ मि॒नुया॑त् स॒प्त वै शी॑र्ष॒ण्याः॑ प्रा॒णाः प्रा॒णाः प॒शवः॑ प्रा॒णैरे॒वास्मै॑
प॒शून्व रु॑न्धे त्रि॒णवा॑भि-भ्रा॒तृव्य॑वत-स्त्रि॒वृत॑मे॒व वज्र॑ सं॒भृत्य॑
भ्रा॒तृव्या॑य प्र॒ हर॑ति स्तृ॒त्या अप॑रि॒मिता॑भिः परि॑ मि॒नुया॑-दप॑रि॒मित॑स्या-
वरु॑द्ध्यै यं का॒मये॑ताप॒शुः स्या॑दित्य॑परि॒मित्य॑ तस्य॑ शर्क॑राः सि॒कता॑
व्यू॑हे॒दपरि॑गृही॒त ए॒वास्य॑ वि॒षूची॑न् रे॒तः परा॑ सि॒ञ्चत्य॑प॒शुरे॒व
भव॑ति – [] 33

TS 5.2.6.3 - Padam

परी॑ति । मि॒नुया॑त् । स॒प्त । वै । शी॑र्ष॒ण्याः॑ । प्रा॒णा इति॑ प्र-अ॒नाः ।
प्रा॒णा इति॑ प्र – अ॒नाः । प॒शवः॑ । प्रा॒णैरिति॑ प्र – अ॒नैः । ए॒व ।

अ॒स्मै । प॒शून् । अ॒वेति॑ । रु॒न्धे । त्रि॒णवा॒भिरिति॑ त्रि – न॒वाभिः॑ ।
 भ्रातृ॑व्यव॒त इति॑ भ्रातृ॑व्य – व॒तः । त्रि॒वृ॒तमि॒ति त्रि – वृ॒तम् । ए॒व ।
 व॒ज्रम् । सं॒भृत्ये॑ति सं – भृ॒त्य । भ्रातृ॑व्याय । प्रेति॑ । ह॒रति॑ । स्तृ॒त्यै ।
 अ॒परि॑मिता॒भिरित्य॑परि – मि॒ताभिः॑ । प॒रीति॑ । मि॒नुया॑त् ।
 अ॒परि॑मित॒स्येत्य॑परि – मि॒तस्य॑ । अ॒वरु॑द्ध्य॒ इत्य॑व – रु॒द्ध्यै । यम् ।
 का॒मये॑त । अ॒पशुः॑ । स्या॒त् । इति॑ । अ॒परि॑मित्ये॒त्यपरि॑ – मि॒त्य ।
 तस्य॑ । श॒र्कराः॑ । सि॒कताः॑ । वी॒ति । ऊ॒हेत् ।
 अ॒परि॑गृही॒त इत्य॑परि – गृ॒हीते॑ । ए॒व । अ॒स्य । वि॒षूची॑नम् । रे॒तः ।
 पे॒रेति॑ । सि॒ञ्चति॑ । अ॒पशुः॑ । ए॒व । भ॒वति॑ । 33 (50)

TS 5.2.6.4

यं का॒मये॑त प॒शुमा॑न्त् स्या॒दिति॑ परि॒मित्य॑ तस्य॑ श॒र्कराः॑ सि॒कता॑
 व्यू॒हेत् परि॑गृही॒त ए॒वास्मै॑ समी॒चीन॑ रे॒तः सि॒ञ्चति॑ प॒शुमा॑ने॒व
 भ॒वति॑ सौ॒म्या व्यू॑हति॒ सोमो॑ वै रे॒तोधा॑ रे॒त ए॒व तद् – द॑धाति॒ गाय॑त्रिया
 ब्रा॒ह्मण॑स्य॒ गाय॑त्रो हि ब्रा॒ह्मण॑ – स्त्रि॒ष्टुभा॑ राज॒न्यस्य॑ त्रै॒ष्टुभो॑ हि राज॒न्यः
 शं॒युं बा॒र्हस्प॑त्यं मे॒धो नो॑पा॒नम॑त् सौ॒ग्निं प्रा॑वि॒शथ् – [] 34

TS 5.2.6.4 - Padam

यम् । कामये॑त । प॒शु॒मा॒नि॒ति॑ प॒शु – मा॒न् । स्या॒त् । इति॑ ।
परि॑मित्येति॑ परि॒-मि॒त्य । तस्य॑ । शर्क॑राः । सि॒क॒ताः । वी॒ति॑ । ऊ॒हे॒त् ।
परि॑गृही॒त इति॑ परि॒ – गृ॒ही॒ते । ए॒व । अ॒स्मै । स॒मी॒ची॒नम् । रे॒तः ।
सिञ्च॑ति । प॒शु॒मा॒नि॒ति॑ प॒शु-मा॒न् । ए॒व । भ॒व॒ति॑ । सौ॒म्या । वी॒ति॑ ।
ऊ॒ह॒ति॑ । सोमः॑ । वै । रे॒तो॒धा इति॑ रे॒तः – धाः । रे॒तः । ए॒व । तत् ।
द॒धा॒ति॑ । गा॒य॒त्रि॒या । ब्रा॒ह्म॒ण॒स्य॑ । गा॒य॒त्रः । हि । ब्रा॒ह्म॒णः । त्रि॒ष्टु॒भा॑ ।
रा॒ज॒न्य॒स्य॑ । त्रै॒ष्टु॒भः । हि । रा॒ज॒न्यः । शँ॒यु॒मि॒ति॑ शं – यु॒म् ।
बा॒र्ह॒स्प॒त्यम् । मे॒धः । न । उ॒पे॒ति॑ । अ॒न॒म॒त् । सः । अ॒ग्नि॒म् ।
प्रे॒ति॑ । अ॒वि॒श॒त् । 34 (50)

TS 5.2.6.5

सोऽ॒ग्नेः कृ॒ष्णो रू॒पं कृ॒त्वो॒दा॒य॒त सोऽ॒श्वं प्रा॒वि॒श॒त् सोऽ॒श्व॒स्या-
वा॒न्त॒र॒श॒फो-ऽभ॒व॒द्-य॒द॒श्व॒मा॒क्र॒म॒य॒ति॑ य ए॒व मे॒धोऽ॒श्वं प्रा॒वि॒श॒त्
तमे॒वा॒व रु॒न्धे प्र॒जा॒प॒ति॒नाऽग्नि॑श्चे॒त॒व्य॑ इ॒त्याहुः॑ प्रा॒जा॒प॒त्योऽ॒श्वो
य॒द॒श्व॒मा॒क्र॒म॒य॒ति॑ प्र॒जा॒प॒ति॒नै॒वाऽग्निं॑ चि॒नु॒ते पु॒ष्कर॑पर्ण॒मुप॑ द॒धा॒ति॑

यो॒नि॒र्वा अ॒ग्नेः पु॒ष्कर॒पर्णं॑ स॒योनि॑- () -मे॒वाग्निं॑ चि॒नुते॒ ऽपां॑
पृ॒ष्ठम॒सीत्यु॑प द॒धात्य॒पां वा॑ ए॒तत् पृ॒ष्ठं य॑त् पु॒ष्कर॒पर्णं॑
रू॒पेणै॒वैन॒दुप॑ द॒धाति॑ ॥ 35

TS 5.2.6.5 - Padam

सः । अ॒ग्नेः । कृ॒ष्णः । रू॒पम् । कृ॒त्वा । उ॒दिति॑ । आ॒यत॑ । सः ।
अ॒श्वम् । प्रेति॑ । अ॒वि॒शत् । सः । अ॒श्वस्य॑ ।
अ॒वा॒न्तर॑श॒फ इत्य॑वा॒न्तर॑ - श॒फः । अ॒भवत् । यत् । अ॒श्वम् ।
आ॒क्र॒म॒य॒तीत्या॑ - क्र॒म॒य॒ति । यः । ए॒व । मे॒धः । अ॒श्वम् । प्रेति॑ ।
अ॒वि॒शत् । तम् । ए॒व । अ॒वेति॑ । रु॒न्धे । प्र॒जाप॑ति॒नेति॑
प्र॒जा - प॒ति॒ना । अ॒ग्निः । चे॒त॒व्यः । इति॑ । आ॒हुः । प्रा॒जाप॑त्य इति॑
प्रा॒जा - प॒त्यः । अ॒श्वः । यत् । अ॒श्वम् । आ॒क्र॒म॒य॒तीत्या॑-क्र॒म॒य॒ति ।
प्र॒जाप॑ति॒नेति॑ प्र॒जा - प॒ति॒ना । ए॒व । अ॒ग्निम् । चि॒नुते॑ ।
पु॒ष्कर॒पर्णमि॑ति पु॒ष्कर॑ - पर्णम् । उ॒पेति॑ । द॒धाति॑ । यो॒निः । वै ।
अ॒ग्नेः । पु॒ष्कर॒पर्णमि॑ति पु॒ष्कर॑ - पर्णम् । स॒योनि॑मि॒ति
स-यो॒निम् () । ए॒व । अ॒ग्निम् । चि॒नुते॑ । अ॒पाम् । पृ॒ष्ठम् । अ॒सि ।

इति॑ । उपेति॑ । दधाति॑ । अपाम् । वै । एतत् । पृष्ठम् । यत् ।
पुष्कर॑पर्णमिति॑ पुष्कर – पर्णम् । रूपेण॑ । एव । एनत् । उपेति॑ ।
दधाति॑ ॥ 35 (70) (इन्द्रः॑ – पशुकामस्य॑ – भवत्य॑ – विशथ् –
सयोनिं॑ – विशतिश्च॑) (A6)

TS 5.2.7.1

ब्रह्म॑ जज्ञानमिति॑ रुक्ममुप॑ दधाति॑ ब्रह्ममुखा॑ वै प्रजापतिः॑ प्रजा
असृजत॑ ब्रह्ममुखा॑ एव तत् प्रजा॑ यजमानः॑ सृजते॑ ब्रह्म॑ जज्ञानमित्याह॑
तस्माद्ब्राह्मणो॑ मुख्यो॑ मुख्यो॑ भवति॑ य एवं॑ वेद॑ ब्रह्मवादिनो॑ वदन्ति॑
न पृथिव्यां॑ नान्तरिक्षे॑ न दिव्यग्निश्चेतव्य॑ इति॑ यत् पृथिव्यां॑ चिन्वीत॑
पृथिवीं॑ शुचा॑ ऽर्पयेन्नौषधयो॑ न वनस्पतयः॑ – [] 36

TS 5.2.7.1 - Padam

ब्रह्म॑ । जज्ञानम् । इति॑ । रुक्मम् । उपेति॑ । दधाति॑ ।
ब्रह्ममुखा॑ इति॑ ब्रह्म – मुखाः । वै । प्रजापतिरिति॑ प्रजा – पतिः ।
प्रजा इति॑ प्र – जाः । असृजत॑ । ब्रह्ममुखा॑ इति॑ ब्रह्म – मुखाः ।
एव । तत् । प्रजा इति॑ प्र – जाः । यजमानः॑ । सृजते॑ । ब्रह्म॑ ।

ज॒ज्ञान॑म् । इति॑ । आ॒ह॒ । तस्मा॑त् । ब्रा॒ह्म॒णः । मुख्यः॑ । मुख्यः॑ ।
भव॑ति । यः । ए॒वम् । वेद॑ । ब्र॒ह्म॒वादि॑न इति॑ ब्र॒ह्म – वादि॑नः ।
वद॑न्ति । न । पृ॒थि॒व्याम् । न । अ॒न्तरि॑क्षे । न । दि॒वि । अ॒ग्निः ।
चेत॑व्यः । इति॑ । यत् । पृ॒थि॒व्याम् । चिन्वी॑त । पृ॒थि॒वीम् ।
शु॒चा । अ॒र्पये॑त् । न । ओष॑धयः । न । वन॑स्पतयः । 36 (50)

TS 5.2.7.2

प्र जा॑येरन् यद॒न्तरि॑क्षे चिन्वी॒तान्तरि॑क्षं शु॒चाऽर्प॑येन्न वया॑ँसि
प्र जा॑येरन् यद्-दि॒वि चिन्वी॑त दि॒वँ शु॒चा ऽर्प॑येन्न पर्जन्यो
वर्षे॑द् रुक्म॑मुप दधात्य॒मृतं॑ वै हि॒र॒ण्यम॑मृत ए॒वाग्निं॑ चिनु॒ते प्रजा॑त्यै
हि॒र॒ण्यम॑यं पु॒रुष॑मुप दधाति यज॑मानलो॒कस्य॑ वि॒धृत्यै॑ यदिष्ट॑काया
आतृ॑ण्णमनूपद॒द्ध्यात् प॑शूनां च यज॑मानस्य च प्रा॒णमपि॑

द॒द्ध्याद् दक्षि॑णतः- [] 37

TS 5.2.7.2 - Padam

प्रेति॑ । जा॑येरन् । यत् । अ॒न्तरि॑क्षे । चिन्वी॑त । अ॒न्तरि॑क्षम् । शु॒चा ।
अ॒र्पये॑त् । न । वया॑ँसि । प्रेति॑ । जा॑येरन् । यत् । दि॒वि । चिन्वी॑त ।

दिव॑म् । शु॒चा । अ॒र्प॒येत् । न । प॒र्जन्यः॑ । व॒र्षे॑त् । रु॒क्मम् ।
उ॒पेति॑ । द॒धा॒ति । अ॒मृत॑म् । वै । हि॒रण्य॑म् । अ॒मृते॑ । ए॒व । अ॒ग्निम् ।
चि॒नु॒ते । प्र॒जा॒त्या इति॑ प्र – जा॒त्यै । हि॒रण्म॑यम् । पु॒रुष॑म् । उ॒पेति॑ ।
द॒धा॒ति । य॒ज॒मा॒न॒लो॒क॒स्येति॑ य॒ज॒मा॒न – लो॒क॒स्य ।
वि॒धृ॒त्या इति॑ वि॒धृ॒त्यै । यत् । इ॒ष्ट॒का॒याः । आ॒तृ॒ण्ण॒मि॒त्या-तृ॒ण्ण॒म् ।
अ॒नूप॑द॒द्ध्य॒ादि॒त्यनु॑ – उ॒प॒द॒द्ध्य॒ात् । प॒शूना॑म् । च । य॒ज॒मा॒न॒स्य ।
च । प्रा॒ण॒मि॒ति प्र – अ॒नम् । अ॒पीति॑ । द॒द्ध्य॒ात् ।

दक्षि॒णतः॑ । 37 (50)

TS 5.2.7.3

प्रा॒ञ्च॒मु॒प द॒धा॒ति दा॒धार॑ य॒ज॒मा॒न॒लो॒कं न प॒शूनां॑ च य॒ज॒मा॒न॒स्य
च प्रा॒ण॒म॒पि द॒धा॒त्यथो॑ ख॒ल्वि॒ष्ट॒का॒या आ॒तृ॒ण्ण॒म॒नूप॑ द॒धा॒ति
प्रा॒णा॒ना॒मु॒त्सृ॒ष्ट्यै द्र॒प्सश्च॑ स्क्॒न्दे॒त्यभि॑ मृ॒शति॑ हो॒त्रा॒स्वे॒वैनं॑
प्रति॑ ष्ठा॒पय॑ति सु॒चा॒वु॒प द॒धा॒त्या॒ज्य॑स्य पू॒र्णा का॒र्ष्म॒र्य॒मयीं॑ द॒द्ध्नः॑
पू॒र्णा-मौ॑दु॒ंबरी॑मि॒यं वै का॒र्ष्म॒र्य॒मय्य॑सा॒वौ-दु॒ंबरी॑मे ए॒वो॒प
धत्ते॑ – [] 38

TS 5.2.7.3 - Padam

प्राञ्चम् । उपेति । दधाति । दाधार । यजमानलोकमिति
यजमान – लोकम् । न । पशूनाम् । च । यजमानस्य । च ।
प्राणमिति प्र – अनम् । अपीति । दधाति । अथो इति । खलु ।
इष्टकायाः । आतृण्णमित्या – तृण्णम् । अनु । उपेति । दधाति ।
प्राणानामिति प्र – अनानाम् । उथ्सृष्ट्या इत्युत् – सृष्ट्यै । द्रप्सः ।
चस्कन्द । इति । अभीति । मृशति । होत्रासु । एव । एनम् ।
प्रतीति । स्थापयति । सुचौ । उपेति । दधाति । आज्यस्य । पूर्णाम् ।
कार्ष्ण्यमयीमिति कार्ष्ण्य – मयीम् । दध्नः । पूर्णाम् । औदुम्बरीम् ।
इयम् । वै । कार्ष्ण्यमयीति कार्ष्ण्य – मयी । असौ । औदुम्बरी ।
इमे इति । एव । उपेति । धत्ते । 38 (50)

TS 5.2.7.4

तूष्णीमुप दधाति न हीमे यजुषाऽऽप्तुमर्हति दक्षिणां कार्ष्ण्यमयी-
मुत्तरामौ-दुम्बरीं तस्मादस्या असावुत्तरा ऽऽज्यस्य पूर्णां कार्ष्ण्यमयीं
वज्रो वा आज्यं वज्रः कार्ष्ण्यो वज्रेणैव यज्ञस्य दक्षिणतो

रक्षा॒स्य॑प॒ ह॒न्ति॑ द॒ध्नः॑ पू॒र्णामौ॑दु॒म्बरीं॑ प॒शवो॑ वै द॒ध्यूर्गु॑दु॒म्बरः॑
प॒शुष्वे॒वोर्जं॑ द॒धाति॑ पू॒र्णे उप॑ द॒धाति॑ पू॒र्णे ए॒वैन॑- [] 39

TS 5.2.7.4 - Padam

तू॒ष्णीम् । उपे॑ति । द॒धा॒ति॒ । न । हि । इ॒मे इति॑ । य॒जुषा॑ । आ॒प्तुम् ।
अ॒र्ह॑ति । दक्षि॑णाम् । का॒र्ष्म॒र्य॒मयी॑मि॒ति का॒र्ष्म॒र्य॒ – मयी॑म् ।
उ॒त्तरा॑मि॒त्युत् – त॒राम् । औ॒दु॒म्बरी॑म् । तस्मा॑त् । अ॒स्याः । अ॒सौ ।
उ॒त्तरे॑त्युत् – त॒रा । आ॒ज्य॑स्य । पू॒र्णाम् । का॒र्ष्म॒र्य॒मयी॑मि॒ति
का॒र्ष्म॒र्य॒ – मयी॑म् । व॒ज्रः । वै । आ॒ज्यम् । व॒ज्रः । का॒र्ष्म॒र्यः ।
व॒ज्रेण॑ । ए॒व । य॒ज्ञस्य॑ । दक्षि॑णतः । रक्षा॑सि । अपे॑ति ।
ह॒न्ति॒ । द॒ध्नः॑ । पू॒र्णाम् । औ॒दु॒म्बरी॑म् । प॒शवः॑ । वै । दधि॑ ।
ऊ॒र्क् । उ॒दु॒म्बरः॑ । प॒शुषु॑ । ए॒व । ऊ॒र्जम् । द॒धा॒ति॒ । पू॒र्णे इति॑ ।
उपे॑ति । द॒धा॒ति॒ । पू॒र्णे इति॑ । ए॒व । ए॒नम् । 39 (50)

TS 5.2.7.5

म॒मुष्मिन्॑ लो॒क उप॑ तिष्ठेते वि॒राज्य॑ग्निश्चे॒तव्य॑ इ॒त्याहुः॑ सु॒ग्वै वि॒राड्
यथ् सु॒चावु॑प॒दधा॑ति वि॒राज्ये॑वाग्निं चि॒नुते॑ य॒ज्ञमु॒खेय॑ज्ञमु॒खे वै

क्रियमाणे यज्ञं रक्षांसि जिघांसन्ति यज्ञमुखं रुक्मो यद्-रुक्मं
 व्याधारयति यज्ञमुखादेव रक्षांस्यप हन्ति पञ्चभिर् व्याधारयति
 पाङ्गो यज्ञो यावानेव यज्ञस्तस्माद्-रक्षांस्यप हन्त्यक्ष्णयाव्या
 धारयति तस्मादक्ष्णया () पशवोऽङ्गानि प्र हरन्ति प्रतिष्ठित्यै ॥ 40

TS 5.2.7.5 - Padam

अमुष्मिन् । लोके । उपेति । तिष्ठेते इति । विराजीति वि – राजि ।
 अग्निः । चेतव्यः । इति । आहुः । स्रुक् । वै । विराडिति वि-राट् ।
 यत् । स्रुचौ । उपदधातीत्युप – दधाति । विराजीति वि – राजि ।
 एव । अग्निम् । चिनुते । यज्ञमुखेयज्ञमुख इति यज्ञमुखे-यज्ञमुखे ।
 वै । क्रियमाणे । यज्ञम् । रक्षांसि । जिघांसन्ति ।
 यज्ञमुखमिति यज्ञ – मुखम् । रुक्मः । यत् । रुक्मम् । व्याधारयतीति
 वि – आधारयति । यज्ञमुखादिति यज्ञ – मुखात् । एव । रक्षांसि ।
 अपेति । हन्ति । पञ्चभिरिति पञ्च – भिः । व्याधारयतीति
 वि – आधारयति । पाङ्गः । यज्ञः । यावान् । एव । यज्ञः । तस्मात् ॥

रक्षा॑सि । अपे॑ति । ह॒न्ति । अ॒क्ष॒ण॒या । व्या॑घारयतीति

वि – आ॑घारयति । तस्मा॑त् । अ॒क्ष॒ण॒या () । प॒श॒वः । अ॒ङ्गानि॑ ।

प्रेति॑ । ह॒रन्ति॑ । प्र॒ति॒ष्ठि॒त्या इति॑ प्र॒ति – स्थि॑त्यै ॥ 40 (55)

(वन॑स्प॒तयो- दक्षि॑णतो- ध॒त्त- ए॒नं- तस्मा॑द॒क्ष॒ण॒या-पञ्च॑ च) (A7)

TS 5.2.8.1

स्व॒य॒मा॒तृ॒ण्णामु॑प दधा॒ती॒यं वै॑ स्व॒य॒मा॒तृ॒ण्णे॒मामे॒वोप॑ ध॒त्ते
ऽश्व॑मु॒प घ्रा॑पयति प्रा॒णमे॒वास्यां॑ दधा॒त्यथो॑ प्रा॒जाप॑त्यो वा अ॒श्वः

प्र॒जाप॑तिनै॒वाग्निं॑ चि॒नुते॑ प्रथ॒मेष्ट॑कोप॒धीय॑माना प॒शूनां॑ च

यज॑मानस्य च प्रा॒णम॑पि दधाति स्व॒य॒मा॒तृ॒ण्णा भ॑वति

प्रा॒णाना॑मु॒त्सृ॑ष्ट्या अथो सु॒वर्ग॑स्य लो॒कस्या॑नु॒ख्या॒त्या

अ॒ग्नाव॑ग्निश्चे॒तव्य॑ इत्याहु॒रेष॑ वा – [] 41

TS 5.2.8.1 - Padam

स्व॒य॒मा॒तृ॒ण्णामि॑ति स्व॒यं – आ॒तृ॒ण्णाम् । उपे॑ति । द॒धा॒ति । इ॒यम् ।

वै । स्व॒य॒मा॒तृ॒ण्णेति॑ स्व॒यं-आ॒तृ॒ण्णा । इ॒माम् । ए॒व । उपे॑ति । ध॒त्ते ।

अ॒श्वम् । उपे॑ति । घ्रा॒पय॑ति । प्रा॒णमि॑ति प्र-अ॒नम् । ए॒व । अ॒स्याम् ।

दधाति । अथो इति । प्राजापत्य इति प्राजा – पत्यः । वै । अश्वः ।
 प्रजापतिनेति प्रजा – पतिना । एव । अग्निम् । चिनुते । प्रथमा ।
 इष्टका । उपधीयमानेत्युप-धीयमाना । पशूनाम् । च । यजमानस्य ।
 च । प्राणमिति प्र – अनम् । अपीति । दधाति । स्वयमातृण्णेति
 स्वयं – आतृण्णा । भवति । प्राणानामिति प्र – अनानाम् ।
 उथ्सृष्ट्या इत्युत् – सृष्ट्यै । अथो इति । सुवर्गस्येति सुवः-गस्य ।
 लोकस्य । अनुख्यात्या इत्यनु – ख्यात्यै । अग्नौ । अग्निः ।
 चेतव्यः । इति । आहुः । एषः । वै । 41 (50)

TS 5.2.8.2

अग्निर्वैश्वानरो यद् ब्राह्मणस्तस्मै प्रथमामिष्टकां यजुष्कृतां प्र यच्छेत्
 तां ब्राह्मण श्रोप दद्ध्याता-मग्नावेव तदग्निं चिनुत ईश्वरो वा एष
 आर्तिमार्तोर्यो-ऽविद्वानिष्टका-मुपदधाति त्रीन् वरान् दद्यात्
 त्रयो वै प्राणाः प्राणानाञ् स्पृत्यै द्वावेव देयौ द्वौ हि प्राणावेक
 एव देय एको हि प्राणः पशु – [] 42

TS 5.2.8.2 - Padam

अ॒ग्निः । वै॒श्वा॒नरः । यत् । ब्रा॒ह्म॒णः । तस्मै॑ । प्र॒थ॒माम् । इ॒ष्ट॒काम् ।
य॒जु॒ष्कृ॒ता॒मि॒ति॒ य॒जुः – कृ॒ता॒म् । प्रेति॑ । य॒च्छे॒त् । ताम् । ब्रा॒ह्म॒णः ।
च । उ॒पेति॑ । द॒द्ध्य॒ता॒म् । अ॒ग्नौ । ए॒व । तत् । अ॒ग्नि॒म् । चि॒नु॒ते ।
ई॒श्वरः । वै । ए॒षः । आ॒र्ति॒म् । आ॒र्तो॒रि॒त्या–अ॒र्तोः । यः । अ॒वि॒द्वान् ।
इ॒ष्ट॒काम् । उ॒प॒द॒धा॒ती॒त्यु॒प – द॒धा॒ति । त्रीन् । व॒रान् । द॒द्यात् । त्रयः॑ ।
वै । प्रा॒णा इति॑ प्र – अ॒नाः । प्रा॒णाना॒मि॒ति॒ प्र – अ॒नाना॑म् । स्पृ॒त्यै॑ ।
द्वौ । ए॒व । दे॒यौ॑ । द्वौ । हि । प्रा॒णावि॒ति॒ प्र – अ॒नौ । ए॒कः । ए॒व ।
दे॒यः । ए॒कः । हि । प्रा॒ण इति॑ प्र – अ॒नः । प॒शुः । 42 (50)

TS 5.2.8.3

–वा॑ ए॒ष य॒द॒ग्नि॒र्न ख॒लु वै प॒शव॑ आ॒य॒व॒से र॒म॒न्ते दूर्वे॑ष्ट॒कामु॑प॒ द॒धा॒ति
प॒शूनां॑ धृ॒त्यै द्वा॒भ्यां प्र॒ति॒ष्ठि॒त्यै का॒ण्डा॑त्का॒ण्डात् प्र॒रो॒ह॒न्ती॒त्याह॑
का॒ण्डे॑नका॒ण्डे॑न ह्ये॒षा प्र॒ति॒ति॒ष्ठ॒त्ये॒वा नो॑ दूर्वे॑ प्र॒ त॒नु स॒ह॒स्रे॑ण श॒तेन॑
चे॒त्याह॑ सा॒ह॒स्रः प्र॒जा॒प॒तिः प्र॒जा॒प॒ते॒रा॒प्त्यै दे॒व॒ल॒क्ष्मं वै त्र्या॑लि॒खि॒ता
ता॒मु॒त्त॒र॒ल॒क्ष्मा॑णं दे॒वा उ॒पा॒द॒ध॒ता–ध॒र॒ल॒क्ष्मा॑ण–म॒सु॒रा यं – [] 43

TS 5.2.8.3 - Padam

वै । ए॒षः । यत् । अ॒ग्निः । न । ख॒लु । वै । प॒शवः॑ । आ॒यव॑से ।
र॒म॒न्ते । दूर्वे॑ष्ट॒कामि॑ति दूर्वा – इ॒ष्ट॒काम् । उ॒पेति॑ । द॒धाति॑ ।
प॒शूना॑म् । धृ॒त्यै ॥ द्वा॒भ्याम् ॥ प्र॒ति॒ष्ठि॒त्या इति॑ प्र॒ति – स्वि॒त्यै ।
का॒ण्डा॑त्का॒ण्डा॑दि॒ति का॒ण्डा॑त् – का॒ण्डा॑त् । प्र॒रोह॑न्तीति प्र॒रोह॑न्ती ।
इति॑ । आ॒ह । का॒ण्डे॑न॒काण्डे॑नेति॒ काण्डे॑न – का॒ण्डे॑न । हि । ए॒षा ।
प्र॒ति॒ति॒ष्ठ॒तीति॑ प्र॒ति – ति॒ष्ठति॑ । ए॒वा । नः । दूर्वे॑ । प्रेति॑ । त॒नु ।
स॒हस्रे॑ण । श॒तेन॑ । च । इति॑ । आ॒ह । सा॒हस्रः॑ । प्र॒जाप॑तिरिति॒
प्र॒जा – प॒तिः । प्र॒जाप॑तेरिति॒ प्र॒जा – प॒तेः । आ॒प्त्यै ॥
दे॒व॒लक्ष्म॑मिति॒ देव॑-ल॒क्ष्मम् । वै । त्र्या॒लि॒खि॒तेति॑ त्रि – आ॒लि॒खि॒ता ।
ताम् । उ॒त्तर॑लक्ष्माणमि॒त्युत्तर॑ – ल॒क्ष्माण॑म् । दे॒वाः । उ॒पेति॑ ।
अ॒द॒धत॑ । अ॒धर॑लक्ष्माणमि॒त्यधर॑ – ल॒क्ष्माण॑म् ।
अ॒सुराः॑ । यम् । 43 (50)

TS 5.2.8.4

कामये॑त वसी॑यान्त् स्यादित्यु॑त्तरलक्ष्माणं॑ तस्यो॑प दद्ध्याद्-वसी॑याने॒व
भवति॑ यं कामये॑त पापी॑यान्त् स्यादित्यध॑रलक्ष्माणं॑ तस्यो॑प
दद्ध्यादसुरयो॑नि-मेवै॑नमनु॒ परा॑ भावयति॒ पापी॑यान् भवति॑ त्र्यालि॒खिता॑
भवती॑मे वै लो॒कास्त्र्यालि॒खितै॑भ्य ए॒व लो॒केभ्यो॑ भ्रातृ॑व्यमन्तरे॒त्यङ्गिर॑सः
सुवर्गं॑ लो॒कं य॑तः पु॒रोडा॑शः कू॒र्मो भू॒त्वा ऽनु॑ प्रास॑र्प- [] 44

TS 5.2.8.4 - Padam

कामये॑त । वसी॑यान् । स्यात् । इति॑ ।
उत्तर॑लक्ष्माणमित्यु॑त्तर-लक्ष्माणम् । तस्य॑ । उपेति॑ । दद्ध्यात् ।
वसी॑यान् । ए॒व । भवति॑ । यम् । कामये॑त । पापी॑यान् । स्यात् ।
इति॑ । अध॑रलक्ष्माणमित्यध॑र- लक्ष्माणम् । तस्य॑ । उपेति॑ ।
दद्ध्यात् । अ॒सुरयो॑निमित्यसुर - योनिम् । ए॒व । ए॒नम् । अनु॑ ।
परेति॑ । भावयति॑ । पापी॑यान् । भवति॑ । त्र्यालि॒खितेति॑
त्रि - आ॒लि॒खिता॑ । भवति॑ । इ॒मे । वै । लो॒काः । त्र्यालि॒खितेति॑
त्रि - आ॒लि॒खिता॑ । ए॒भ्यः । ए॒व । लो॒केभ्यः॑ । भ्रातृ॑व्यम् । अ॒न्तः ।

ए॒ति । अ॒ङ्गि॒र॒सः । सु॒व॒र्ग॒मि॒ति सु॒वः – ग॒म् । लो॒क॒म् । य॒तः ।

पु॒रो॒डा॒शः । कू॒र्मः । भू॒त्वा । अ॒नु । प्रे॒ति । अ॒स॒र्प॒त् । 44 (50)

TS 5.2.8.5

– द्यत् कू॒र्ममु॒प॒द॒धा॒ति यथा॑ क्षे॒त्र॒वि॒द॒ञ्ज॒सा न॒य॒त्ये॒वमे॒वैनं॑ कू॒र्मः
सु॒व॒र्गं लो॒क॒म॒ञ्ज॒सा न॒य॒ति मे॒धो वा ए॒ष प॒शूनां॑ यत् कू॒र्मो यत्
कू॒र्ममु॒प॒द॒धा॒ति स्वमे॒व मे॒धं प॒श्य॒न्तः प॒शव॑ उप॒ तिष्ठ॑न्ते श्म॒शानं॑ वा
ए॒तत् क्रि॒य॒ते यन्मृ॑ता॒नां प॒शूनां॑ शी॒र्षा॒ण्यु॒प॒धी॒य॒न्ते यज्जी॑वन्तं
कू॒र्ममु॒प॒द॒धा॒ति तेना॑श्म॒शान॑चिद्–वास्त॒व्यो वा ए॒ष यत् –[] 45

TS 5.2.8.5 - Padam

यत् । कू॒र्मम् । उ॒प॒द॒धा॒तीत्यु॒प – द॒धा॒ति । यथा॑ । क्षे॒त्र॒वि॒दि॒ति
क्षे॒त्र – वि॒त् । अ॒ञ्ज॒सा । न॒य॒ति । ए॒वम् । ए॒व । ए॒नम् । कू॒र्मः ।
सु॒व॒र्ग॒मि॒ति सु॒वः – ग॒म् । लो॒क॒म् । अ॒ञ्ज॒सा । न॒य॒ति । मे॒धः । वै ।
ए॒षः । प॒शूना॑म् । यत् । कू॒र्मः । यत् । कू॒र्मम् ।
उ॒प॒द॒धा॒तीत्यु॒प – द॒धा॒ति । स्व॒म् । ए॒व । मे॒धम् । प॒श्य॒न्तः ।
प॒शवः॑ । उ॒पे॒ति । तिष्ठ॑न्ते । श्म॒शान॑म् । वै । ए॒तत् । क्रि॒य॒ते । यत् ।

मृ॒ताना॑म् । प॒शूना॑म् । शी॒र्षाणि॑ । उप॒धी॒यन्त॑ इत्युप – धी॒यन्ते॑ ।
यत् । जी॒वन्त॑म् । कू॒र्मम् । उप॒दधा॑तीत्युप – दधा॑ति । तेन॑ ।
अ॒श्म॒शान॑चि॒दित्य॑श्म॒शान॑ – चि॒त् । वा॒स्तव्यः॑ । वै । ए॒षः ।

यत् । 45 (50)

TS 5.2.8.6

कू॒र्मो मधु॑ वा॒ता ऋ॒ताय॑त इति॑ द॒द्ध्ना मधु॑मि॒श्रेणा॑भ्य॒नक्ति॑
स्व॒दय॑त्ये॒वैनं॑ ग्रा॒म्यं वा॑ ए॒तदन्नं॑ यद्-द॒द्ध्यार॑ण्यं मधु॑ यद् द॒द्ध्ना
मधु॑मि॒श्रेणा॑-भ्य॒नक्त्यु॑भय॒स्या-वरु॑द्ध्यै म॒ही द्यौः॑ पृ॒थि॒वी च॑ न
इत्या॑हाऽऽभ्या॒मेवैन॑मु॒भय॑तः परि॑ गृ॒ह्णाति॑ प्राञ्च॒मुप॑ दधा॑ति सु॒वर्ग॑स्य
लो॒कस्य॑ स॒मष्ट्यै॑ पु॒रस्ता॑त् प्र॒त्यञ्च॒मुप॑ दधा॑ति तस्मा॑त् – [] 46

TS 5.2.8.6 - Padam

कू॒र्मः । मधु॑ । वा॒ताः । ऋ॒ताय॑त इत्यृ॒त – य॑ते । इति॑ । द॒द्ध्ना ।
मधु॑मि॒श्रेणेति॑ मधु॑ – मि॒श्रेण॑ । अ॒भीति॑ । अ॒नक्ति॑ । स्व॒दय॑ति । ए॒व ।
ए॒नम् । ग्रा॒म्यम् । वै । ए॒तत् । अ॒न्नम् । यत् । दधि॑ । आ॒रण्यम् ।
मधु॑ । यत् । द॒द्ध्ना । मधु॑मि॒श्रेणेति॑ मधु॑ – मि॒श्रेण॑ ।

अ॒भ्य॒न॒क्ती॒त्य॒भि – अ॒न॒क्ति॑ । उ॒भय॑स्य । अ॒व॒रु॒द्ध्य॒ इत्य॑व॒-रु॒द्ध्यै॑ ।
म॒ही । द्यौः॑ । पृ॒थि॒वी । च॒ । नः॑ । इति॑ । आ॒ह॒ । आ॒भ्याम् । ए॒व ।
ए॒नम् । उ॒भय॑तः । प॒रीति॑ । गृ॒ह्णाति॑ । प्रा॒ञ्चम् । उ॒पेति॑ । द॒धाति॑ ।
सु॒व॒र्ग॒स्येति॑ सु॒वः – ग॒स्य॑ । लो॒क॒स्य॑ । स॒म॒ष्ट्या॑ इति॑ सं-अ॒ष्ट्यै॑ ।
पु॒रस्ता॑त् । प्र॒त्य॒ञ्चम् । उ॒पेति॑ । द॒धाति॑ । तस्मा॑त् । 46 (50)

TS 5.2.8.7

पु॒रस्ता॑त् प्र॒त्य॒ञ्चः॑ प॒शवो॑ मे॒धमु॑प॒ तिष्ठ॑न्ते यो वा अ॒प॒ना॒भि॒म॒ग्निं
चि॒नुते॑ यज॒मान॑स्य ना॒भि॒म॒नु प्र॑ वि॒शति॑ स ए॒नमी॑श्व॒रो
हि॒॒सि॒तो-रु॒लू॒ख॒लमु॑प॒ दधा॑त्येषा वा अ॒ग्नेर्ना॒भिः स॒ना॒भि॒मे॒वाग्निं
चि॒नुते॑ ऽहि॒॒सा॒या औ॒दु॒म्बरं॑ भव॒त्यूर्वा॑ उ॒दु॒म्बर॑ ऊ॒र्जमे॒वाव॑ रु॒न्धे
म॒द्ध्य॑त॒ उप॑ द॒धाति॑ म॒द्ध्य॑त॒ ए॒वास्मा॑ ऊ॒र्जं द॒धाति॑ तस्मा॑न्-()-
म॒द्ध्य॑त॒ ऊ॒र्जा भु॑ञ्जत॒ इय॑द्-भवति॑ प्र॒जाप॑तिना य॒ज्ञमु॑खेन
सं॒मि॒त॒मव॑ ह॒न्त्य॒न्नमे॒वाक॑-वै॒ष्णव्य॑र्चो॒प द॒धाति॑ वि॒ष्णुर्वै॑ य॒ज्ञो वै॒ष्णावा
व॒नस्प॑तयो य॒ज्ञ ए॒व य॒ज्ञं प्रति॑ ष्ठापयति ॥ 47

TS 5.2.8.7 - Padam

पुरस्तात् । प्रत्यञ्चः । पशवः । मेधम् । उपेति । तिष्ठन्ते । यः । वै ।
 अपनाभिमित्यप – नाभिम् । अग्निम् । चिनुते । यजमानस्य ।
 नाभिम् । अनु । प्रेति । विशति । सः । एनम् । ईश्वरः । हिंसितोः ।
 उलूखलम् । उपेति । दधाति । एषा । वै । अग्नेः । नाभिः ।
 सनाभिमिति स – नाभिम् । एव । अग्निम् । चिनुते । अहिंसायै ।
 औदुम्बरम् । भवति । ऊर्क् । वै । उदुम्बरः । ऊर्जम् । एव । अवेति ।
 रुन्धे । मद्ध्यतः । उपेति । दधाति । मद्ध्यतः । एव । अस्मै ।
 ऊर्जम् । दधाति । तस्मात् () । मद्ध्यतः । ऊर्जा । भुञ्जते ।
 इयत् । भवति । प्रजापतिनेति प्रजा – पतिना । यज्ञमुखेनेति
 यज्ञ – मुखेन । संमितमिति सं – मितम् । अवेति । हन्ति ।
 अन्नम् । एव । अकः । वैष्णव्या । ऋचा । उपेति । दधाति । विष्णुः ।
 वै । यज्ञः । वैष्णवाः । वनस्पतयः । यज्ञे । एव । यज्ञम् । प्रतीति ।
 स्थापयति ॥ 47 (77) (एष वै – पशु – र्य – मसर्प – देष यत् –
 तस्मात् – तस्मात् – सप्तविंशतिश्च) (A8)

TS 5.2.9.1

ए॒षां वा॑ ए॒तल्लो॒कानां॑ ज्यो॒तिः॑ सम्भृ॑तं यदु॒खा यदु॒खा-मु॒प॒द॒धा॒त्येभ्य॑
ए॒व लो॒केभ्यो॑ ज्यो॒तिर॒व रु॒न्धे म॒द्ध्य॒त उप॑ दधाति म॒द्ध्य॒त ए॒वास्मै॑
ज्यो॒तिर्द॒धाति॑ तस्मा॒न्म॒द्ध्य॒तो ज्यो॒तिरु॒पाऽऽस्महे॑ सि॒क॒ताभिः॑
पूर॒य॒त्ये॒तद्-वा अ॒ग्नेर्वै॑श्वा॒नर॒स्य रू॒पम् रू॒पेणै॒व वै॑श्वा॒नर॒मव॑ रु॒न्धे
यं का॒मये॑त क्षो॒धुकः॑ स्या॒दित्यू॒नां तस्यो॒प- [] 48

TS 5.2.9.1 - Padam

ए॒षाम् । वै । ए॒तत् । लो॒काना॑म् । ज्यो॒तिः॑ । संभृ॑तमि॒ति सं-भृ॑तम् ।
यत् । उ॒खा । यत् । उ॒खाम् । उ॒प॒द॒धा॒तीत्यु॒प-द॒धाति॑ । ए॒भ्यः॑ । ए॒व ।
लो॒केभ्यः॑ । ज्यो॒तिः॑ । अ॒वेति॑ । रु॒न्धे । म॒द्ध्य॒तः । उ॒पेति॑ । द॒धाति॑ ।
म॒द्ध्य॒तः । ए॒व । अ॒स्मै । ज्यो॒तिः॑ । द॒धाति॑ । तस्मा॑त् । म॒द्ध्य॒तः ।
ज्यो॒तिः॑ । उ॒पेति॑ । आ॒स्महे॑ । सि॒क॒ताभिः॑ । पू॒र॒य॒ति । ए॒तत् । वै ।
अ॒ग्नेः॑ । वै॒श्वा॒नर॒स्य । रू॒पम् । रू॒पेण॑ । ए॒व । वै॒श्वा॒नर॒म् । अ॒वेति॑ ।
रु॒न्धे । यम् । का॒मये॑त । क्षो॒धुकः॑ । स्या॒त् । इति॑ । ऊ॒नाम् । तस्य॑ ।
उ॒पेति॑ । 48 (50)

TS 5.2.9.2

द॒द्ध्या॒त् क्षो॑धु॒क ए॒व भ॑वति॒ यं का॒मये॒ता-नु॑पदस्य-द॒न्नम॑द्यादि॒ति
पू॒र्णां तस्यो॑प द॒द्ध्याद॑नुपदस्य-दे॒वान्न॑म॒त्ति स॒हस्रं॑ वै प्र॒ति पु॒रुषः॑
प॒शूनां॑ य॒च्छति॑ स॒हस्र॑म॒न्ये प॒शवो॑ म॒द्ध्ये पु॒रुष॑शी॒र्षमु॑प दधाति
स॒वीर्य॑त्वायो॒खाया॑-म॒पि द॑धाति प्र॒तिष्ठा॑मे॒वैन॑द्-गमयति॒ व्यृ॑द्धं वा
ए॒तत् प्रा॒णैर॑मे॒द्ध्यं य॑त् पु॒रुष॑शी॒र्षम॑मृ॒तं ख॒लु वै प्रा॒णा - [] 49

TS 5.2.9.2 - Padam

द॒द्ध्या॒त् । क्षो॑धु॒कः । ए॒व । भ॑वति॒ । यम् । का॒मये॒त ।
अ॒नुप॑दस्यदि॒त्यनु॑प - द॒स्य॒त् । अ॒न्नम् । अ॒द्यात् । इति॑ । पू॒र्णाम् ।
तस्य॑ । उ॒पेति॑ । द॒द्ध्या॒त् । अ॒नुप॑दस्यदि॒त्यनु॑प - द॒स्य॒त् । ए॒व ।
अ॒न्नम् । अ॒त्ति । स॒हस्र॑म् । वै । प्र॒तीति॑ । पु॒रुषः॑ । प॒शूनाम् ।
य॒च्छति॑ । स॒हस्र॑म् । अ॒न्ये । प॒शवः॑ । म॒द्ध्ये ।
पु॒रुष॑शी॒र्षमि॑ति पु॒रुष - शी॒र्षम् । उ॒पेति॑ । द॒धाति॑ ।
स॒वीर्य॑त्वाये॒ति स॒वीर्य॑-त्वाय॑ । उ॒खाया॑म् । अ॒पीति॑ । द॒धाति॑ ।

प्रति॑ष्ठामि॒ति॑ प्रति॑ – स्था॒म् । ए॒व । ए॒न॒त् । ग॒म॒य॒ति॑ । व्य॑द्धमि॒ति॑
वि – ऋ॒द्ध॒म् । वै । ए॒त॒त् । प्रा॒णैरि॑ति॒ प्र – अ॒नैः । अ॒मे॒द्ध्य॒म् ।
यत् । पु॒रु॒ष॒शीर्ष॑मि॒ति॑ पु॒रु॒ष – शी॒र्ष॒म् । अ॒मृ॒त॒म् । ख॒लु । वै ।
प्रा॒णा इति॑ प्र – अ॒नाः । 49 (50)

TS 5.2.9.3

अ॒मृ॒तं॑ हिर॒ण्यं प्रा॒णेषु॑ हिर॒ण्य॒श॒ल्कान् प्रत्य॑स्यति॒ प्रति॑ष्ठामे॒वैन॑द्-
गम॑यित्वा प्रा॒णैः स॒म॒र्द्ध्य॑ति॒ द॒ध्ना म॑धुमि॒श्रेण॑ पू॒रय॑ति
म॒ध॒व्यो ऽसा॑नीति॒ शृ॒ता॒त॒ङ्क्ये॑न मे॒द्ध्य॒त्वाय॑ ग्रा॒म्यं वा॑ ए॒तद॑न्नं
य॑द्-द॒द्ध्यार॑ण्यं म॒धु यद् द॒ध्ना म॑धुमि॒श्रेण॑ पू॒रय॑त्यु॒भय॑स्या-व॒रु॑द्ध्यै
प॒शु॒शीर्षा॑ण्युप दधाति॒ प॒श॒वो वै प॑शु॒शीर्षा॑णि प॒शू॒ने॒वाव॑ रु॒न्धे
यं का॒मये॑ताप॒शुः स्या॑दिति-[] 50

TS 5.2.9.3 - Padam

अ॒मृ॒त॒म् । हिर॒ण्य॒म् । प्रा॒णेष्वि॑ति॒ प्र – अ॒नेषु॑ । हिर॒ण्य॒श॒ल्का॒नि॒ति॑
हिर॒ण्य – श॒ल्का॒न् । प्र॒ती॒ति॑ । अ॒स्य॑ति॒ । प्र॒ति॒ष्ठामि॑ति॒ प्रति॑-स्था॒म् ।
ए॒व । ए॒न॒त् । ग॒म॒य॒ित्वा । प्रा॒णैरि॑ति॒ प्र-अ॒नैः । स॒मि॒ति॑ । अ॒र्द्ध्य॑ति॒ ।

द॒द्ध॒ना । म॒धु॒मि॒श्रे॒णेति॑ म॒धु-मि॒श्रे॒ण । पू॒र॒य॒ति । म॒ध॒व्यः । अ॒सा॒नि ।
 इति॑ । शृ॒ता॒त॒ङ्क्ये॑नेति॑ शृ॒त - आ॒त॒ङ्क्ये॑न । मे॒द्ध्य॒त्वाये॑ति
 मे॒द्ध्य - त्वाय॑ । ग्रा॒म्यम् । वै । ए॒तत् । अ॒न्नम् । यत् । दधि॑ ।
 आ॒र॒ण्यम् । म॒धु । यत् । द॒द्ध॒ना । म॒धु॒मि॒श्रे॒णेति॑ म॒धु - मि॒श्रे॒ण ।
 पू॒र॒य॒ति । उ॒भय॑स्य । अ॒वरु॑द्ध्य॒ इत्य॑व - रु॒द्ध्यै ।
 प॒शु॒शीर्॒षाणी॑ति प॒शु - शी॒र्षा॒णि । उ॒पेति॑ । द॒धा॒ति । प॒श॒वः । वै ।
 प॒शु॒शीर्॒षाणी॑ति प॒शु - शी॒र्षा॒णि । प॒शून् । ए॒व । अ॒वेति॑ । रु॒न्धे ।
 यम् । का॒मये॑त । अ॒प॒शुः । स्या॒त् । इति॑ । 50 (50)

TS 5.2.9.4

वि॒षू॒ची॒ना॒नि त॒स्यो॒प द॒द्ध्य॒ाद्-वि॒षू॒च ए॒वास्मा॑त् प॒शून् द॒धा॒त्य॒प॒शु॒रे॒व
 भ॒व॒ति यं का॒मये॑त प॒शु॒मान्थ्-स्या॑दि॒ति स॒मी॒ची॒ना॒नि त॒स्यो॒प
 द॒द्ध्य॒ाथ् स॒मी॒च ए॒वास्मै॑ प॒शून् द॒धा॒ति प॒शु॒मा॒ने॒व भ॒व॒ति पु॒रस्ता॑त्
 प्र॒ती॒ची॒न॒मश्च॑स्यो॒प द॒धा॒ति प॒श्चा॒त् प्रा॒ची॒न॒मृष॑भ॒स्या-प॑श॒वो वा अ॒न्ये
 गो॒अ॒श्वे॑भ्यः प॒श॒वो गो॒अ॒श्वाने॑वास्मै॑ स॒मी॒चो द॒धा॒त्ये-ता॒वन्तो॑ वै
 प॒श॒वो - [] 51

TS 5.2.9.4 - Padam

वि॒षू॒ची॒नानि॑ । तस्य॑ । उपे॒ति॑ । द॒द्ध्य॒यात् । वि॒षू॒चः । ए॒व । अ॒स्मात् ।
प॒शून् । द॒धा॒ति॑ । अ॒प॒शुः । ए॒व । भ॒व॒ति॑ । यम् । का॒म॒ये॒त॑ ।
प॒शु॒मा॒नि॒ति॑ प॒शु - मा॒न् । स्या॒त् । इति॑ । स॒मी॒ची॒नानि॑ । तस्य॑ ।
उपे॒ति॑ । द॒द्ध्य॒यात् । स॒मी॒चः । ए॒व । अ॒स्मै । प॒शून् । द॒धा॒ति॑ ।
प॒शु॒मा॒नि॒ति॑ प॒शु - मा॒न् । ए॒व । भ॒व॒ति॑ । पु॒र॒स्ता॒त् । प्र॒ती॒ची॒नम्॑ ।
अ॒श्व॒स्य॑ । उपे॒ति॑ । द॒धा॒ति॑ । प॒श्चा॒त् । प्रा॒ची॒नम् । ऋ॒ष॒भ॒स्य॑ ।
अ॒प॒श॒वः । वै । अ॒न्ये । गो॒अ॒श्वे॒भ्य॑ इति॑ गो - अ॒श्वे॒भ्यः । प॒श॒वः ।
गो॒अ॒श्वा॒नि॒ति॑ गो - अ॒श्वा॒न् । ए॒व । अ॒स्मै । स॒मी॒चः । द॒धा॒ति॑ ।
ए॒ता॒व॒न्तः । वै । प॒श॒वः । 51 (50)

TS 5.2.9.4

द्वि॒पा॒दश्च॑ च॒तु॒ष्पा॒दश्च॑ ता॒न् । वा ए॒त॒द॒ग्नौ॑ प्र द॒धा॒ति॑ यत् प॒शु॒शी॒र्षा॒ण्यु॒प॒
-द॒धा॒त्य॑-मु॒मा॒र॒ण्य॒म॒नु॑ ते दि॒शा॒मी॒त्या॒ह॑ ग्रा॒म्ये॒भ्य॑ ए॒व प॒शु॒भ्य॑ आ॒र॒ण्या॒न्
प॒शू॒ञ्छु॒च॑-म॒नू॒त्सृ॒ज॒ति॑ तस्मा॒त् स॒मा॒व॒त् प॒शू॒नां॑ प्र॒जा॒य॒मा॒ना॒ना-

मा॒र॒ण्याः प॒श॒वः क॒नी॒या॒ऽसः शु॒चा ह्य॒ताः सर्प॑शी॒र्ष॒मुप॑ दधाति॒ यैव
सर्पे॑ त्विषि॒स्तामे॒वाव॑ रुन्धे – [] 52

TS 5.2.9.5 - Padam

द्वि॒पाद॑ इति॒ द्वि – पा॒दः । च । चतु॑ष्पाद॒ इति॒ चतुः॑ – पा॒दः । च ।
तान् । वै । ए॒तत् । अ॒ग्नौ । प्रेति॑ । द॒धाति॑ । यत् ।
प॒शु॒शी॒र्षा॒णीति॑ प॒शु – शी॒र्षा॒णि । उ॒प॒द॒धा॒तीत्यु॑प – द॒धाति॑ ।
अ॒मुम् । आ॒र॒ण्यम् । अ॒न्विति॑ । ते । दि॒शामि॑ । इति॑ । आ॒ह ।
ग्रा॒म्येभ्यः॑ । ए॒व । प॒शुभ्य॑ इति॒ प॒शु – भ्यः॑ । आ॒र॒ण्यान् । प॒शून् ।
शु॒चम् ॥ अनु॑ । उ॒दिति॑ । सृ॒जति॑ । तस्मा॑त् । स॒माव॑त् । प॒शूनाम् ।
प्र॒जाय॑माना॒नामिति॑ प्र – जा॒य॑माना॒नाम् । आ॒र॒ण्याः । प॒श॒वः ।
क॒नी॒या॒ऽसः । शु॒चा । हि । ऋ॒ताः । सर्प॑शी॒र्षमिति॑
सर्प॑ – शी॒र्षम् । उपेति॑ । द॒धाति॑ । या । ए॒व । सर्पे॑ । त्विषिः॑ ।
ताम् । ए॒व । अ॒वेति॑ । रुन्धे॑ । 52 (50)

TS 5.2.9.5

यत् समीचीनं पशुशीर्षैरुपदध्याद् ग्राम्यान् पशून् दंशुकाः
स्युर्यद्-विषूचीन-मारण्यान्. यजुरेव वदेदव तां त्विषिं रुन्धे या
सर्पे न ग्राम्यान् पशून्. हिनस्ति नाऽऽरण्यानथो खलूपधेयमेव
यदुपदधाति तेन तां त्विषिमव रुन्धे या सर्पे यद्-यजुर्वदति
तेन शान्तं ॥ 53

TS 5.2.9.6 - Padam

यत् । समीचीनम् । पशुशीर्षैरिति पशु - शीर्षैः ।
उपदध्यादित्युप - दध्यात् । ग्राम्यान् । पशून् । दंशुकाः ।
स्युः । यत् । विषूचीनम् । आरण्यान् । यजुः । एव । वदेत् ।
अवेति । ताम् । त्विषिम् । रुन्धे । या । सर्पे । न । ग्राम्यान् ।
पशून् । हिनस्ति । न । आरण्यान् । अथो इति । खलु ।
उपधेयमित्युप - धेयम् । एव । यत् । उपदधातीत्युप - दधाति ।
तेन । ताम् । त्विषिम् । अवेति । रुन्धे । या । सर्पे । यत् । यजुः ।
वदति । तेन । शान्तम् ॥ 53 (44)

(ऊनान्तस्योप॑ – प्राणाः॑ – स्यादिति॑ – वै पशवो॑ – रुन्धे॑ –
चतुश्चत्वारि॑शच्च) (A9)

TS 5.2.10.1

पशु॑र्वा ए॒ष यद॒ग्निर्यो॑निः खलु॑ वा ए॒षा प॒शोर्वि॑ क्रियते॒ यत्
प्राची॑नमैष्टकाद्-यजुः॑ क्रियते॒ रेतो॑ ऽप॒स्या अप॒स्या उप॑ दधाति॒
योनावे॑व रेतो॑ दधाति॒ पञ्चो॑प दधाति॒ पाङ्गाः॑ प॒शवः॑ प॒शूने॒वास्मै॑
प्र॒ जन॑यति॒ पञ्च॑ दक्षिणतो॒ वज्रो॑ वा अ॒पस्या॑ वज्रेणै॒व यज्ञ॑स्य
दक्षि॑णतो रक्षा॒स्यप॑ हन्ति॒ पञ्च॑ पश्चात् – [] 54

TS 5.2.10.1 - Padam

पशुः॑ । वै । ए॒षः । यत् । अ॒ग्निः । यो॑निः । खलु॑ । वै । ए॒षा ।
प॒शोः । वी॑ति । क्रि॒यते॑ । यत् । प्राची॑नम् । ऐष्ट॑कात् । यजुः॑ ।
क्रि॒यते॑ । रेतः॑ । अ॒पस्याः॑ । अ॒पस्याः॑ । उपे॑ति । दधा॑ति । यो॒नौ ।
ए॒व । रेतः॑ । दधा॑ति । पञ्च॑ । उपे॑ति । दधा॑ति । पाङ्गाः॑ । प॒शवः॑ ।
प॒शून् । ए॒व । अ॒स्मै । प्रे॑ति । जन॑यति । पञ्च॑ । दक्षि॑णतः । वज्रः॑ ।

वै । अप॒स्याः॑ । वज्रे॑ण । ए॒व । य॒ज्ञस्य॑ । दक्षि॑णतः । रक्षा॑सि ।
अपे॑ति । ह॒न्ति । पञ्च॑ । पश्चा॑त् । 54 (50)

TS 5.2.10.2

प्राची॑रुप दधाति पश्चा॑द् वै प्राची॑नं॒ रेतो॑ धीयते पश्चा॑देवास्मै
प्राची॑नं॒ रेतो॑ दधाति पञ्च॑ पुरस्ता॑त् प्रती॑चीरुप दधाति पञ्च॑
पश्चा॑त् प्राची॑स्तस्मा॑त् प्राची॑नं॒ रेतो॑ धीयते प्रती॑चीः प्रजा॑ जायन्ते
पञ्चो॑त्तरत॑ छन्द॒स्याः प॒शवो॑ वै छन्द॒स्याः प॒शूने॒व प्रजा॑तान्थ्
स्व-मा॑यतनमभि पर्यू॑हत इ॒यं वा॑ अ॒ग्ने-रति॑दाहादबिभेथ्

सैता -[] 55

TS 5.2.10.2 - Padam

प्राचीः॑ । उपे॑ति । दधा॑ति । पश्चा॑त् । वै । प्राची॑नम् । रे॒तः । धी॒यते॑ ।
पश्चा॑त् । ए॒व । अ॒स्मै । प्राची॑नम् । रे॒तः । दधा॑ति । पञ्च॑ ।
पुरस्ता॑त् । प्रती॑चीः । उपे॑ति । दधा॑ति । पञ्च॑ । पश्चा॑त् । प्राचीः॑ ।
तस्मा॑त् । प्राची॑नम् । रे॒तः । धी॒यते॑ । प्रती॑चीः । प्रजा॑ इति प्र-जाः ।
जा॒यन्ते॑ । पञ्च॑ । उत्तर॑त इत्युत् - तर॑तः । छन्द॒स्याः । प॒शवः॑ ।

वै । छन्दस्याः । पशून् । एव । प्रजातानिति प्र – जातान् । स्वम् ।
आयतनमित्या – यतनम् । अभि । परीति । ऊहते । इयम् । वै ।
अग्नेः । अतिदाहादित्यति – दाहात् । अबिभेत् । सा ।

एताः । 55 (50)

TS 5.2.10.3

अपस्या अपश्यत् ता उपाधत्त ततो वा इमां नात्यदहद्-यदपस्या
उपदधात्यस्या अनतिदाहायोवाच हेय-मददिथ् स ब्रह्मणाऽन्नं यस्यैता
उपधीयान्तै य उ चैना एवं वेददिति प्राणभृत उप दधाति रेतस्येव
प्राणान् दधाति तस्माद्-वदन् प्राणन् पश्यञ्छृण्वन् पशुर्जायते

ऽयं पुरो – [] 56

TS 5.2.10.3 - Padam

अपस्याः । अपश्यत् । ताः । उपेति । अधत्त । ततः । वै । इमाम् ।
न । अतीति । अदहत् । यत् । अपस्याः । उपदधातीत्युप – दधाति ।
अस्याः । अनतिदाहायेत्यनति – दाहाय । उवाच । ह । इयम् ।
अदत् । इत् । सः । ब्रह्मणा । अन्नम् । यस्य । एताः ।

उप॒धी॒यान्ता॑ इत्यु॒प – धी॒यान्तै॑ । यः । उ । च । ए॒नाः । ए॒वम् ।
वेद॑त् । इति॑ । प्रा॒णभृ॑त् इति॑ प्रा॒ण-भृ॑तः । उपेति॑ । दधाति॑ । रेत॑सि ।
ए॒व । प्रा॒णानि॑ति प्र – अ॒नान् । दधाति॑ । तस्मा॑त् । वद॑न् ।
प्रा॒णन्नि॑ति प्र – अ॒नन् । पश्य॑न् । शृ॒ण्वन् । प॒शुः । जा॒यते॑ ।

अ॒यम् । पु॒रः । 56 (50)

TS 5.2.10.4

भुव॑ इति॑ पु॒रस्ता॑दु॒प दधाति॑ प्रा॒णमे॒वैता॑भि-र्दा॒धारा॑यं दक्षि॒णा
वि॒श्वक॑र्मेति॑ दक्षि॒णतो॑ मन॑ ए॒वैता॑भिर्दा॒धारा॑यं प॒श्चाद्-वि॒श्वव्य॑चा इति॑
प॒श्चा-च्चक्षु॑-रे॒वैता॑भि-र्दा॒धारे॑द-मु॒त्तरा॑थ सु॒व-रि॒त्युत्तर॑तः
श्रो॒त्रमे॒वैता॑भि-र्दा॒धारे॑यमु॒परि॑ म॒तिरि॒त्युपरि॑ष्ठाद्-वा॒चमे॒वैता॑भि-
दा॒धार द॑शद॒शोप॑ दधाति॑ स॒वीर्य॑त्वायाक्ष॒णयो- [] 57

TS 5.2.10.4 - Padam

भुवः॑ । इति॑ । पु॒रस्ता॑त् । उपेति॑ । दधाति॑ । प्रा॒णमि॑ति प्र – अ॒नम् ।
ए॒व । ए॒ताभिः॑ । दा॒धार । अ॒यम् । दक्षि॒णा ।
वि॒श्वक॑र्मेति॑ वि॒श्व-क॑र्मा । इति॑ । दक्षि॒णतः॑ । मनः॑ । ए॒व । ए॒ताभिः॑ ।

दा॒धार॒ । अ॒यम् । प॒श्चात् । वि॒श्वव्य॑चा॒ इति॑ वि॒श्व – व्य॒चाः ।
 इति॑ । प॒श्चात् । चक्षुः॑ । ए॒व । ए॒ताभिः॑ । दा॒धार॒ । इ॒दम् ।
 उ॒त्तरा॑दित्युत् – त॒रात् । सु॒वः । इति॑ । उ॒त्तर॑त इत्युत् – त॒रतः॑ ।
 श्रो॒त्रम् । ए॒व । ए॒ताभिः॑ । दा॒धार॒ । इ॒यम् । उ॒परि॑ । म॒तिः । इति॑ ।
 उ॒परि॑ष्ठात् । वाच॑म् । ए॒व । ए॒ताभिः॑ । दा॒धार॒ । द॒शद॑शेति द॒श–द॒श ।
 उ॒पेति॑ । द॒धाति॑ । स॒वीर्य॑त्वायेति स॒वीर्य॑–त्वाय॑ । अ॒क्ष्ण॒या । 57 (50)

TS 5.2.10.5

–प॒ द॒धाति॑ तस्मा॒दक्ष्ण॑या प॒शवो॑ऽङ्गानि॒ प्र ह॑रन्ति॒ प्रति॑ष्ठित्यै॒ याः
 प्रा॒ची॒स्ताभि॑–र्वसि॑ष्ठ आ॒र्द्ध॒नोद् या॑ दक्षि॒णा ता॑भिर्भर॒द्वाजो॑ याः
 प्र॒ती॒ची॒स्ताभि॑ वि॒श्वामि॑त्रो या॒ उदी॑ची॒स्ताभि॑–र्ज॒मद॑ग्निर्या
 ऊ॒र्ध्वा॒स्ताभि॑–वि॒श्वकर्मा॑ य ए॒वमे॒तासा॑–मृ॒द्धिं वै॒दर्ध॑नोत्ये॒व
 य आ॑सामे॒वं ब॒न्धुतां॑ वै॒द ब॑न्धु॒मान् भ॑वति॒ य आ॑सामे॒वं क्लृ॑प्तिं
 वै॒द क॑ल्पते– [] 58

TS 5.2.10.5 - Padam

उ॒पेति॑ । द॒धाति॑ । तस्मा॑त् । अ॒क्ष॒ण॒या । प॒श॒वः । अ॒ङ्गा॒नि । प्रेति॑ ।
हर॑न्ति । प्र॒ति॒ष्ठि॒त्या इति॑ प्र॒ति – स्थि॑त्यै । याः । प्रा॒चीः । ताभिः॑ ।
वसि॑ष्ठः । आ॒र्द्ध॒नोत् । याः । द॒क्षि॒णा । ताभिः॑ । भ॒र॒द्वा॒जः । याः ।
प्र॒ती॒चीः । ताभिः॑ । वि॒श्वामि॑त्र इति॑ वि॒श्व – मि॒त्रः । याः । उ॒दी॒चीः ।
ताभिः॑ । ज॒मद॑ग्निः । याः । ऊ॒र्द्ध॒वाः । ताभिः॑ । वि॒श्वक॑र्मेति
वि॒श्व – क॒र्मा । यः । ए॒वम् । ए॒ता॒साम् । ऋ॒द्धिम् । वेद॑ ।
ऋ॒द्ध॒नोति॑ । ए॒व । यः । आ॒साम् । ए॒वम् । ब॒न्धु॒ताम् । वेद॑ ।
ब॒न्धु॒मानि॑ति ब॒न्धु – मा॒न् । भ॒वति॑ । यः । आ॒साम् । ए॒वम् ।
क्लृ॑प्तिम् । वेद॑ । क॒ल्प॒ते । 58 (50)

TS 5.2.10.6

ऽस्मै॑ य आ॒सामे॒वमा॒यत॑नं वे॒दाऽऽ॒यत॑नवान् भ॒वति॑ य आ॒सामे॒वं
प्र॒ति॒ष्ठां वे॒द प्र॒त्ये॒व ति॑ष्ठति प्रा॒णभृ॑त उप॒धाय॑ सँ॒यत॑ उप॒ दधा॑ति
प्रा॒णा॒ने॒वास्मि॑न् धि॒त्वा सँ॒यद्भिः॑ सं यँ॑च्छति तथ् सँ॒यता॑
सँ॒यत्त्व॑मथो प्रा॒ण ए॒वापा॑नं द॒धाति॑ तस्मा॑त् प्रा॒णापा॑नौ सं च॒रतो॑

विषू॑चीरु॑प दधा॑ति तस्मा॑द्-विष्व॑ञ्चौ प्रा॒णापा॑नौ यद् वा

अग्ने॑रसं॑यत- [] 59

TS 5.2.10.6 - Padam

अस्मै॑ । यः । आ॒साम् । ए॒वम् । आ॒यत॑नमित्या॑ - यत॑नम् । वेद॑ ।

आ॒यत॑नवा॒नित्या॑यत॑न - वा॒न् । भ॒वति॑ । यः । आ॒साम् । ए॒वम् ।

प्र॒तिष्ठा॑मिति॑ प्र॒ति - स्था॑म् । वेद॑ । प्र॒तीति॑ । ए॒व । तिष्ठ॑ति । प्रा॒णभृ॑त

इति॑ प्रा॒ण - भृ॑तः । उ॒पधा॑येत्यु॒प - धा॑य । सं॑यत॑ इति॑ सं - यतः॑ ।

उ॒पेति॑ । दधा॑ति । प्रा॒णानि॑ति प्र - अ॒नान् । ए॒व । अ॒स्मिन् । धि॒त्वा ।

सं॑यद्भि॒रिति॑ सं॑यत् - भिः । स॒मिति॑ । य॒च्छति॑ । तत् । सं॑यता॒मिति॑

सं - यता॑म् । सं॑य॒त्वमिति॑ सं॑यत् - त्वम् । अथो॑ इति॑ । प्रा॒ण

इति॑ प्र - अ॒ने । ए॒व । अ॒पा॒नमि॑त्यप - अ॒नम् । दधा॑ति । तस्मा॑त् ।

प्रा॒णापा॑नावि॒ति प्रा॒ण-अ॒पा॒नौ । स॒मिति॑ । च॒रतः॑ । विषू॑चीः । उ॒पेति॑ ।

दधा॑ति । तस्मा॑त् । विष्व॑ञ्चौ । प्रा॒णापा॑नावि॒ति प्रा॒ण-अ॒पा॒नौ । यत् ।

वै । अग्नेः॑ । अ॒सं॑यत॑मित्य॒सं - यत॑म् । 59 (50)

TS 5.2.10.7

–मसुवर्ग्यमस्य तथ् सुवर्ग्योऽग्निर्यथ् सँयत उप दधाति समेवैनं
यच्छति सुवर्ग्यमेवाक-स्त्र्यविर्ययः कृत-मयाना-मित्याह
वयोभिरेवायानव रुन्धे ऽयैर्वयाँसि सर्वतो वायुमतीर्भवन्ति
तस्मादयँ सर्वतः पवते ॥ 60

TS 5.2.10.7 - Padam

असुवर्ग्यमित्यसुवः – ग्यम् । अस्य । तत् । सुवर्ग्य इति
सुवः – ग्यः । अग्निः । यत् । सँयत इति सं – यतः ।
उपदधातीत्युप – दधाति । समिति । एव । एनम् । यच्छति ।
सुवर्ग्यमिति सुवः – ग्यम् । एव । अकः । त्र्यविरिति
त्रि – अविः । वयः । कृतम् । अयानाम् । इति । आह । वयोभिरिति
वयः – भिः । एव । अयान् । अवेति । रुन्धे । अयैः । वयाँसि ।
सर्वतः । वायुमतीरिति वायु – मतीः । भवन्ति । तस्मात् । अयम् ।
सर्वतः । पवते ॥ 60 (35) (पश्चा – देताः – पुरो – ऽक्षण्या –
कल्पते – ऽसं यतं – पञ्चत्रिंशच्च) (A10)

TS 5.2.11.1

गा॒य॒त्री त्रि॒ष्टुब् जग॑त्यनु॒ष्टुक् प॒ङ्क्त्या॑ सह ।
बृ॒ह॒त्यु॒ष्णिहा॑ क॒कु॒त् सू॒चीभिः॑ शि॒म्यन्तु॑ त्वा ॥
द्वि॒प॒दा या चतु॑ष्प॒दा त्रि॒प॒दा याच॑ षट्प॒दा ।
स॒छ॒न्दा या च वि॒च्छ॒न्दाः सू॒चीभिः॑ शि॒म्यन्तु॑ त्वा ॥
म॒हा॒ना॒म्नी रे॒व॒त॒यो वि॒श्वा आ॒शाः प्र॒सू॒व॒रीः ।
मे॒घ्या वि॒द्युतो॑ वाचः सू॒चीभिः॑ शि॒म्यन्तु॑ त्वा ॥
र॒ज॒ता हरि॑णीः सी॒सा यु॒जो यु॒ज्यन्ते॑ कर्म॒भिः ।
अ॒श्व॒स्य वा॒जिन॑स्त्व॒चि सू॒चीभिः॑ शि॒म्यन्तु॑ त्वा ॥
नारी॑ – [] 61

TS 5.2.11.1 - Padam

गा॒य॒त्री । त्रि॒ष्टुप् । जग॑ती । अ॒नु॒ष्टु॒गि॒त्यनु॑-स्तुक् । प॒ङ्क्त्या॑ । सह ॥
बृ॒ह॒ती । उ॒ष्णिहा॑ । क॒कु॒त् । सू॒चीभिः॑ । शि॒म्यन्तु॑ । त्वा ॥ द्वि॒प॒देति॑
द्वि – प॒दा । या । चतु॑ष्प॒देति॑ चतुः – प॒दा । त्रि॒प॒देति॑ त्रि – प॒दा ।
या । च । षट्प॒देति॑ षट् – प॒दा ॥ स॒छ॒न्दा इति॑ स – छ॒न्दाः । या ।

च । वि॒च्छन्दा॑ इति॒ वि – छन्दाः॑ । सू॒चीभिः॑ । शि॒म्यन्तु॑ । त्वा ॥
महाना॑म्नीरिति॒ महा – नाम्नीः॑ । रेवत॑यः । विश्वाः॑ । आशाः॑ ।
प्रसू॑वरीरिति॒ प्र – सूवरीः॑ ॥ मेघ्याः॑ । वि॒द्युत॑ इति॒ वि – द्युतः॑ ।
वाचः॑ । सू॒चीभिः॑ । शि॒म्यन्तु॑ । त्वा ॥ रज॑ताः । हरि॑णीः । सीसाः॑ ।
युजः॑ । यु॒ज्यन्ते॑ । कर्म॑भिरिति॒ कर्म – भिः॑ ॥ अश्व॑स्य । वा॒जिनः॑ ।
त्वचि॑ । सू॒चीभिः॑ । शि॒म्यन्तु॑ । त्वा ॥ नारीः॑ । 61 (50)

TS 5.2.11.2

–स्ते॑ प॒त्नयो॑ लोम॒ वि चि॑न्वन्तु मनी॒षया॑ ।
दे॒वानां॑ प॒त्नीर्दिशः॑ सू॒चीभिः॑ शि॒म्यन्तु॑ त्वा ॥
कु॒विद॑ङ्ग यवमन्तो॒ यवं चि॑द् यथा॒ दान्त्य॑नुपूर्वं॒ वियू॑य ।
इहे॑हैषां कृणुत॒ भोज॑नानि॒ ये बर्हि॑षो नमो॑वृक्तिं॒ न जग्मुः॑ ॥ 62

TS 5.2.11.2 - Padam

ते । प॒त्नयः॑ । लोम॑ । वी॒ति । चि॑न्वन्तु । मनी॒षया॑ ॥ दे॒वानाम्॑ ।
प॒त्नीः॑ । दिशः॑ । सू॒चीभिः॑ । शि॒म्यन्तु॑ । त्वा ॥ कु॒वित् । अ॒ङ्ग ।
यवमन्त॑ इति॒ यव – मन्तः॑ । यवम् । चि॒त् । यथा॑ । दान्ति॑ ।

अ॒नु॒पूर्व॑मित्य॒नु – पूर्व॑म् । वि॒यू॒येति॑ वि – यू॒य ॥

इ॒हे॒हे॒ती॒ह – इ॒ह । ए॒षाम् । कृ॒णु॒त । भो॒ज॒नानि॑ । ये । ब॒र्हि॒षः ।

नमो॑वृ॒क्तिमि॒ति नमः॑ – वृ॒क्तिम् । न । ज॒ग्मुः ॥ 62 (30)

(नारी॑ – स्त्रि॒श॒च्य) (A11)

TS 5.2.12.1

क॒ स्त्वा॑ च्छ॒यति॑ क॒ स्त्वा॑ वि॒ शा॒स्ति॑ क॒ स्ते॒ गा॒त्राणि॑ शि॒म्यति॑ ।

क॒ उ॒ ते॒ श॒मिता॑ क॒विः॑ ॥

ऋ॒तव॑ स्त ऋ॒तु॒धा प॒रुः श॒मिता॑रो वि॒ शा॒सतु॑ ।

सँ॒व॒थ्स॒रस्य॑ धा॒यसा॑ शि॒मीभिः॑ शि॒म्यन्तु॑ त्वा ॥

दै॒व्या अ॒ध्व॒र्यव॑स्त्वा च्छ॒यन्तु॑ वि॒ च॒ शा॒सतु॑ ।

गा॒त्राणि॑ प॒र्व॒शस्ते॑ शि॒माः कृ॒ण्वन्तु॑ शि॒म्यन्तः॑ ॥

अ॒र्ध॒मा॒साः प॒रु॒षि॑ ते॒ मा॒साः छ॒यन्तु॑ शि॒म्यन्तः॑ ।

अ॒हो॒रा॒त्राणि॑ म॒रुतो॑ वि॒लिष्ट॑ – [] 63

TS 5.2.12.1 - Padam

कः । त्वा । छ्यति । कः । त्वा । वीति । शास्ति । कः । ते ।
गात्राणि । शिम्यति ॥ कः । उ । ते । शमिता । कविः ॥ ऋतवः ।
ते । ऋतुधेत्युतु - धा । परुः । शमितारः । वीति । शासतु ॥
सँवत्सरस्येति सं - वत्सरस्य । धायसा । शिमीभिः । शिम्यन्तु ।
त्वा ॥ दैव्याः । अर्ध्वर्यवः । त्वा । छ्यन्तु । वीति । च । शासतु ॥
गात्राणि । पर्वश इति पर्व - शः । ते । शिमाः । कृण्वन्तु ।
शिम्यन्तः ॥ अर्धमासा इत्यर्ध - मासाः । परूष्णि । ते ।
मासाः । छ्यन्तु । शिम्यन्तः ॥ अहोरात्राणीत्यहः - रात्राणि ।
मरुतः । विलिष्टमिति वि - लिष्टम् । 63 (50)

TS 5.2.12.2

सूदयन्तु ते ॥
पृथिवी ते ऽन्तरिक्षेण वायु शिच्छद्रं भिषज्यतु ।
द्यौ स्ते नक्षत्रैः सह रूपं कृणोतु साधुया ॥

शं॑ ते॒ परै॑भ्यो॒ गात्रै॑भ्यः॒ शम॑स्त्ववरे॑भ्यः ।

शम॑स्थभ्यो॒ मज्ज॑भ्यः॒ शमु॑ ते॒ तनु॑वे॒ भुवत् ॥ 64

TS 5.2.12.2 - Padam

सू॒दय॑न्तु । ते॒ ॥ पृ॒थि॒वी । ते॒ । अ॒न्तरि॑क्षेण । वा॒युः । छि॒द्रम् ।

भि॒षज्य॑तु ॥ द्यौः । ते॒ । नक्ष॑त्रैः । स॒ह । रू॒पम् । कृ॒णो॑तु । सा॒धुया ॥

शम् । ते॒ । परै॑भ्यः । गात्रै॑भ्यः । शम् । अ॒स्तु । अ॒वरे॑भ्यः ॥ शम् ।

अ॒स्थभ्य॑ इत्य॒स्थ – भ्यः । मज्ज॑भ्य इति॒ मज्ज – भ्यः । शम् । उ॒ ।

ते॒ । तनु॑वे॒ । भुवत् ॥ 64 (30) (विलि॑ष्टं – त्रि॒ंशच्च॑) (A12)

Prasna Korvai with starting Padams of 1 to 12 Anuvaakams :-

(विष्णु॑मुखा – अन्न॑पते – याव॑ती – वि॒ वै – पुरु॑षमात्रेणा –
ग्ने॒ तव॒ श्रवो॒ वयो – ब्रह्म॑ जज्ञान॑ – स्वय॑मातृ॒ण्णा – मेषां॑ वै –
पशु॑ – गा॒यत्री – कस्त्वा – द्वाद॑श)

Korvai with starting Padams of 1, 11, 21 Series of Panchaatis :-

(विष्णु॑मुखा – अप॑चिति॒मान् – वि॒ वा ए॒ता – वग्ने॒ तव –
स्वय॑मातृ॒ण्णां – वि॒षू॒ची॒नानि॑ – गा॒यत्री – चतु॑ष्षष्टिः)

First and Last Padam of Second Prasnam of 5th Kandam

(विष्णु॑मुखा – स्त॒नु॒वे भुवत्)

॥ हरिः॑ ओं ॥

॥ कृष्ण यजुर्वेदीय तैत्तिरीय संहितायां पद पाठे

पञ्चमकाण्डे द्वितीयः प्रश्नः समाप्तः ॥

Details of Panchati and Padam for Kandam 5 , Prasanam 2 (TS 5.2)

	Panchati	Padams
Anuvakam 1	7	342
Anuvakam 2	6	292
Anuvakam 3	7	347
Anuvakam 4	4	198
Anuvakam 5	6	325
Anuvakam 6	5	270
Anuvakam 7	5	255
Anuvakam 8	7	377
Anuvakam 9	6	294
Anuvakam 10	7	335
Anuvakam 11	2	80
Anuvakam 12	2	80
Total →	64	3195

Notes:

1. Please refer to the book “TS Kandam 1” and “TS 1.1 pada paadam with Vaakyam” for notes and conventions used in this Compilation.
2. Please download our vedic compilations from our web site www.vedavms.in